

# NYUMÀ MWÎMPÈ

## WAKAFIDIIBWA BWÀ CINYÌ?



Nudi numòna's, Mwaneetu Neville ùtu wítábuuja ditentekelangana dya byanza.

Ndi mmòna ne ndi ne ndambu wa nkonko. Mpindyewu, nêngàngate yòyi eyi mààlabà dilòòlò, bwalu ncyèna ne díbà dya kunùkenketelayi dilòòlò edi to, pàmwápa mu Diyíisha dya dilòòlò dya ndekeelu. Mpindyewu, muntu yèyè ne lukonko pa kantu kanà kònsò kàà mu Diyíisha, ùlwe anu kuyitèeka dilòòlò kampànda, nenku mèmè ndi mwa kuyàngata dilòòlò didi dilondà.

<sup>2</sup> Mpindyewu, mààlabà dilòòlò ndi muswe kusangana, anyi, kupetakù ndambu wa bambi, kwòkù mushindu; kwòkù kakùyi mushindu to, ndambu wa balùme anyi bakàji, bímpè ne bashindàme batùdiku mwa kubìikidisha díbà dya twètù naabò dijinga, bwa ne bu. . .

Mààlabà dilòòlò tudi tubanga, paanyimà pàà Diyíisha, kutentekelangana byanza, nenku, bwa Nyuma Mwîmpè. Ne pashiishe, nekwikalè. . . Wèwè udi ne dyèsè dya kushààla kaaba aka mene pawikalà uringa nanku, mu matuku ònsò à diikisha aa, piikalàbi bikèngela ntàntà bule abu bwa wèwè kufwà. Ne pashiishe—pashiishe, kabìyi nanku to, wèwè uringa kuyiila kwebe kumbelu, mona's, tudi bafwànyine kwikala ne disànka, bu wèwè mwa kubwela mu kaaba kampànda mùdì. . . Wèwè kùyi anu mumanye kwa kuya. . .

Tudi baswè kupetakù ndambu wa bambi, nombà yabo, piikalàbo beenyi; nombà yabo, mwaba wùdìbo basòmbèle, kutùdì mwa kubàpetelakù dyàkàmwè; nenku kwikala ne umwe mu díkù kampànda, umwe mu dikwabo, ne umwe mu dikwabo, bwa bààmòna mwa kunwambila cyà dyenza, nwènù bìikalà mwa kukèba dibènesha dinene ditùdì twamba edi abu, dibàtiiza dya Nyuma Mwîmpè.

<sup>3</sup> Makèèlèlè dilòòlò tuvwa twamba, “cìvwàYe.” *Nyuma Mwîmpè Úvwa Cinyi?* Nenku twètù kusangana ne Úvwa anu pàmwè ne byònsò, bìvwà Nzambi mutùlayè abi. Uh-huh. Mu Yèyè twètù kusangana anu menemene cìvwà Ekeleeziya wa Nzambi mwa kwikala naaci dijinga. Twètù kusangana ne Yèyè ùvwa citampì, Musàmbi, diikisha, ne disànka, ne ditalala, ne dibìikà dya ku lufù. Ne cyònsò citù Nzambi mulaye Ekeleeziya Wendè aci, cidì cisanganyiiibwa mu Nyuma Mwîmpè.

<sup>4</sup> Nenku mpindyewu, dilòòlò edi, tudi baswè kuyiisha pa, anyi kwakula pa, kulongesha pa. . . Ndi ne mabeji matwe ku asatu

anyi anaayi mwaba ewu a bidì bifùnda, anyi Mifùndu, pa Yèyè awu, mùdì. . . Makeelela dilòòlò mvwa mushiye Mukànda wànyì wà Cruden wa dipetangana dya myakù kaaba aka, kadi ncìvwa muwàngàte to. Kadi bìvwa bikèngela anu bwa mèmè kukenketa ne mwànyì mwònsò bwa kupeta Mifùndu leelu ewu. Mpindyewu, ne mààlabà. . . Dilòòlò edi tudi tulongesha pa: *Kiipàcìlà Kàà Nzambi Pa Kutùma Nyuma Mwìmpè Kàvwa Kàà Cinyì?* Yèyè ùdikù bwa cinyì? Pìikalàbi ne Yèyè ncintu cinène mushindu awu, dîbà adi Nzambi wàkaMutùma bwa cinyì?

<sup>5</sup> Pashiishe, mààlabà dilòòlò tudi baswè kwakula pa ne: *Yèyè Ùdi Bwèbè Wèwè Anyì?* ne *Wèwè Udi UMupeta Munyi?* ne *Udi Umanya Munyi Paùdì UMupeta?*

Ne pashiishe, paanyimà pàà twètù bamanè kukenketa aci, ne Mifùndu, tucyùmvwijila ku Mifùndu, tukwàta mudimu ne Mifùndu bwa bintu byònsò, pashiishe aba bàdì bàkèba Nyuma Mwìmpè nebàlwe dîbà adi. Nenku dîbà adi ndi ntèkemena ne ditàbuluja nediikalè munkaci mwa kwenzeka, kubangila anu piine apu, bwa kutùngunuka dîbà adi ne Nyuma Mwìmpè.

<sup>6</sup> Mpindyewu, bu mùdìbi ne mààlabà dilòòlò bààbùngì mbafwànyine kushààla ntàntà mu bibambalu mu ekeleeziya, ndi ndyumvwa ne bu twètù mwa kupetakù bambi bààbùngì ne bantu bàtùku balabùlèlèlèbùle dilombola dya bantu ku dipeta dya Nyuma Mwìmpè, bwa kubàkànkamikakù, bwa kuya kabwela mu nzùbu ne—ne mukàji ne bàyendè, anyi—anyi ne muntu kampànda udi ukèba Nyuma Mwìmpè, udikù mupetè bìmpè dìleeja dya njila pa cidì cikèngela kwenza.

Bu wèwè anu mwa kufilakù nombà webè wa tèlèfonè anyi mwaba wutùdiku mwa kukupetela kùdì mpaasàtà, dilòòlò edi anyi dilòòlò dya mààlabà. Mufilè anu kùdì Mwaneetu Neville cyanàànà, dîbà adi aci ncifwànyinekù kwenza bwa katùyì ne cya kudìsangisha bwa disangisha kampànda to. Fila wèwè anu nombà webè wa tèlèfonè cyanàànà kutùdiku bafwànyine kukupetela. Ne pashiishe ambà ne: “Nèngìikalèku, ne bu twètù. . . nwènù baswè kuntèèka mu nzùbu kampànda.” Byòbi ne m—mmukàji nkààyendè, dîbà adi tudi bafwànyine kutùma muntu mukàji, nwamònu’s, tumutùma kùdì yèyè mukàji awu. Ne pashiishe, byòbi ne mmu nzùbu mùdì muntu mulùme ne mukàjèndè, mòna’s, tudi bafwànyine kutùma mwambi kampànda.

Nenku tudikù bafwànyine kwikala ne disànkà dya kwikala neebe mu dikwàcishangana mu mudimu, bwalu ndi mumanye ne, muntu ne muntu, nudi bajingè cyòci eci, cidì citàmbe kwikala cya mushinga munene eci. Nenku vùlukààyi ne: “Ewu udi usùngila musùukà ku cilèma, mmubwikìdije musùmba wà mpekaatu.” Nwamònu anyi? Ne Mukàji—musela wa Kilisto ùdi ne nzala ne nyòòtà. Yèyè ùdi mu didìnyènga dya lulèlu, bwa kulela bàna bàà Nzambi.

<sup>7</sup> Nenku mpindyewu, dilòòlò edi, kumpàlà kwa twètù kubala Mifùndù, twánjàayi kwinyikakù mitù yetu katanci bwa disambila. Kadi anu kumpàlà mene kwa twètù kusambila, nwènù bàdi ne mitù yenu miinyika abu, nudi bafwànyine kwikala ne dilòmba kampànda anyi? Elàayi anu byanza byenu muulu nwamba ne: “Nzambi, nyewu ngeela byanza byànyì muulu kakùyì tuseku to. Ndi ne dijinga. Ndi ndòmba bwa Ùngambùlwishèku, Éyì Mukalenge.” Nzambi àbeneshèku yònsò wa kunùdi. Yèyè mmumòne byanza byenu abi. Banjelo báfundu malòmba àbò awu.

<sup>8</sup> Nenku, Taatù wa mu Dyulu, nyewu tulwa mpindyewu, tuseemena cyàkàbìdì Kùdi mu disambila. Bamanyè kakùyì mpatà to, ne disambila dikaavwa dimanè kwenjiibwa munkaci mwa bânà bàà Nzambi emu dilòòlò edi, mu mwaba mukese ewu, ne misambu yikaadi mimbiibwe, ne tukàavwa babàndishe myoyi kuulu mu macyònkómoka a disànka bwa butùmbì bwa Nzambi.

<sup>9</sup> Davidì wàkamba ne ùvwà mwa kubwela mu disangisha dya bansantu ne kumanyisha malòmba èndè. Kadi dilòòlò edi, nkwekù kùdi byanza byàbùngì. Míngà misangu, pàmwàpa, ndi mufwànyine kwamba ne, mbya pa lukàmà makumi mwandamukùlù bya bàdi basòmbe mu citanda emu dilòòlò edi bàdi beelè byanza muulu bwa malòmba. Bìdi bileeja, Mukalenge, ne katwènakù mwa kwikalakù katùyì Neebe to. Bikèngela twikalè Neebe Wèwè, ku ditùkù ne ku ditùkù. Wèwè ki wètù Mwoyi, dyetu disànka, bwetu bukole bwa mubidi, dyetu dikàndà didì ditùtwe mpàndà, cyetu cyeyemenu wetù, ngabu, ngabu wetù wa dikàndameena nendè mwena lukunà.

Nenku katwènakù anu bafwànyine kulwangana mvità ya mwoyi eyi katùyì Neebe to. Mbifwànyine kwikala bya kabiyiku mwa kwenzeka to nansha bishi bwa twètù kuyilwangana, ne bìdi bikèngela bwa twètù kwikala anu baKweyèmène mu byònsò. Bwalu, tudi bamanyè ne tudi twendela mu buloba bwa midimà ne bubwicidile. Ku luseke ne ku luseke lwònsò mwena lukuna mmutùcincimike, mu kwela kwa matèyì ne misùbulà. Tujila twètù, Mukalenge, ntùle tente ne matèyì a mwena lukunà, bwa kutùtònkola.

<sup>10</sup> Ne twètù biine, peetu, tudi bamanyè ne, ku ndekeelu kwa njila tudi ne cibandabanda cile, cya mundidimbì cidì cìbìikidiibwà ne ndufù aci bwa twètù kupicilamù. Éyì Mukalenge, udi mufwànyine kutùkwàtakù ku byanza ki nganyì dìbà adìs? Tudi baswè kuKumanya Wèwè mpindyewu, Mukalenge. Tudi baswè kumanya ne Wèwè udi mukwate byanza byetu, ne twètù bakwàte Cyebe cyanza, bwa twamònakù mwa kwikala ne ditwishiibwa didì dyele lwongò adi dya ne patwàfikà pa dìbà dinene dya ndekeelu dya mwoyi wètù adi, ku cibweledi cya ciibi cidì cìbìikidiibwà ne ndufù aci, bwa twamònakù mwa kwamba pàmwè ne munsantu wa kale awu ne: “Ndi

muMumanye mu bukolè bwa dibìikà Dyèndè dya ku lufù, ne ndi mumanye ne pààbìikilàYe, nêmpatukè munkaci mwa bafwè.”

<sup>11</sup> Mpindyewu, Taatù Nzambi, tudikù baswè kulòmba bwa Wèwè kubènesha malòmba ètù ne didisangisha dyetu. Bèneshàku Méyì Èbè. Ne bu mémè mwa kwamba ní ncinyì ní ncinyì cya cifwànyine kwikala cibèngàngàne ne Dìyì Dyebe anyì ne diswa Dyebe, Wèwè uci di anu ne bukolè bwa kumbwikidija mukana, muWàkenza mu bwinà bwa ntambwe pàvwà Danyèlè mwómù apu. Ne tudi tulòmba, Mukalenge, bwa Wèwè kukàngulakù maci ne myoyi dilòlò edi, bwa ne, ùjuulèmu nzala ne nyòòtà. Swàku bwa bóbò bàpetè nyòòtà mu mushindu wà kabàyikù mwa kupeta tulù anyi diikisha to, mwaba nansha wumwe, too ne pìikalà Musàmbi mulwe.

<sup>12</sup> Tudi biitábùùje ne tudi ne mwoyi mu matùkù a ndekeelu, mu mundidimbi wà Dilwa Dyèndè. Ne kwòkù aku nkùdi Mayiisha aa maludikila, Mukalenge. Mbwa bantu kwikalabò babàwùle maci, bangàte didimwija. Ne swàku, dilòlò edi, tùmushè anu cizubu, anu patùdi twakulangana apa, tùcitèèkè ku luseke lwà cibàsà, twamba ne: “Mukalenge Nzambi, mémè ndi lupànzà Lwebe. Nyuma Webè àpaasalalèkù munda mwànyì. Mfwimbèku ùngenzè mùdi diswa Dyebe. Mémè nèndekelelè mwoyi wànyì, dikàndà dyànyì, byònsò byànyì, ku bwalu Bwebe Wèwè.”

<sup>13</sup> Tùmvwilèku, Mukalenge. Katwèna apa bwa kutùmònabò to, mu dilòlò dya mvula edi. Katwèna apa anu bwa ne tudi bapangè kukwabo kwa kuya to. Tudi apa mbwa kiipàcilà kamwepele kakàyi kàà tuseku to, kansantu, kàà cijila mu myoyi yetu, nkàà ne, kuseemena pabwìpì Neebe, biikàle bamanyè ne Utu mulaye ne twètù baseemène pabwìpì Neebe, Wèwè neuseemène pabwìpì neetu. Ne mbwà bwalu abu butùdi kaaba aka. Ewu udi ubwela mwikàle ne nzala kààkupàtuka ne nzala to. “Bàà dyàkalengèle ng’aba bàdi ne nzala ne nyòòtà ya bwakàne,” mwàkambà Yesu, “bwalu bóbò nebùùjiibwè.” Ne twètù tulòmba dyàmpà, katwàkupeta dibwe nansha. Ki ditwishii bwa ditùdi twètù naadi ndyòdi adi. Ne twètù balòmbè mushipa, katwàkupeta nyòka nansha. Kadi, Nzambi Taatù wetù neàtùdiishè ne Manà a mu Dyulu, Dìyì Dyèndè ne Nyuma Wendè bìdi bìMufidila bujaadiki abi. Andàmùnàku ku masambila ètù, Mukalenge, ne ku malòmba ètù, patùdi batùngùnùke ne kuKwindila apa. Mu Dìnà dya Yesu Kilisto mmutùdi tulòmba nunku. Amen.

<sup>14</sup> Mpindyewu, nwènù bàdi munkaci mwa kufùnda Mifùndù eyi, bu nwènù mwa kubuululakù pàmwè naanyì cyàkàbìdi mu Yone Munsantu, nshapìtà wa 14. Tudi baswe kubangila ku nshapìtà wa 14 wa Yone Munsantu. Nenukù túbangilàayi ku mvensà wa 14, Yone Munsantu 14.14, bwa kubala anu katùpà kàà Mufùndù ewu cyanàànà. Mpindyewu, mu cyòci eci nenùsanganè dyumvwija dyàbúngi dya bìndi muswe kwamba dilòlò edi.

<sup>15</sup> Nenukù vùlukàayi, nwènù bàdi ne Bibles ya màleetà makùnze

ne, mbifùnda ne màyi makúnze, byôbì ebi. M'Méyi àdi Yesu Yéyè mwíne mwakule, pa nanku twétù tudikù mwa kushààla ne ditwìshiiibwa ne nebiikalè anu mùdiYe mwambe amu. “Maulu ne buloba nebijiminè, kadi Dìyi Dyèndè kadyàkupangilakù to.”

Mpindyewu netùbalè kubangila ku mvensà wa 14 wa nshapità wa 14.

*Nwènú balòmbè cintu kanà cyònsò mu dínà dyànyì, mèmè nèncyènzè.*

Mulayi mubènesha kaayi's wè!

*Nwènú bannangè, nùlamàayi méyi ànyì matùma.*

*Ne mèmè nèndombè Taatù, ne yéyè neànùpèeshè Musàmbi mukwabo, bwa kushàalayè neenù kashidi,*

*Nyuma wa bulelèlè mene, udi bàà pa buloba kabàyi mwa kupeta, bwalu kabèèna bàmumòna to, . . .*

Mpindyewu, nwènú bàdi baswè kubadila mu Bible wa cyena Ngelikà, nudi bafwànyine kucimwèna mwómò emu, kí. . . Kumòna mwómò amu mbwena kwamba ne “kuumvwa.” “Bwalu bàà pa buloba kabèèna bàMuumvwa to.” Aci ncilelèlè anu menemene. Ngǎnji ncibalùlùlèku mpindyewu.

*Nyuma wa bulelèlè mene, udi. . .bulelèlè, udi bàà pa buloba kabàyi mwa kupeta, bwalu kabèèna bàmumòna, ne kabèèna bamumanyè to, kadi nwènú nudi bamumanyè (Nganyi? Musàmbi.) bwalu yéyè udi ùsòmba neenù mpindyewu (dìbà dya mpindyewu), . . . yéyè udi ùsòmba neenù, ne neikalè munda mwenu.*

Yéyè ùdi cinyi? Musàmbi umwèumwè awu.

*Ncyàkunùshìya kanùyi busàmbi to, mèmè. . .*

Muntu kanà yònsò ewu mmumanye ne “mèmè” mmupinganyi muleeji muntu.

*. . . mèmè nèndwe kunùdi.*

*Kadi katancì kakese, bàà pa buloba kabèèna bàmmòna kabidi to; kadi nwènú ne. . .kadi nwènú nudi nummòna; bwalu ndi ne mwoyi, nwènú peenu nenwikalè ne mwoyi.*

*Mu ditùkù adi nenùmanyè ne mèmè ndi munda mwa Taatù, ne nwènú munda mwànyì, ne mèmè munda mwenu.*

Mwaba awu ngwikalà meeji ànyì mwa kwimanyina, kadi netùbalè tùpwekè kwìnshì ndambu. Ngǎnji mbalèbì cyòcì aci pààcì mpindyewu, cyàkàbìdì.

*Mu ditùkù adi (ditùkù dinene, ditùkù dya cilumbulwidi), ditùkù adi nenùmanyè ne mèmè ndi munda mwa Taatù, ne nwènú munda mwànyì, ne mèmè munda mwenu.*

*Ewu udi ne dīyì dyànyì ditùma, ne ùàlama, yéyè awu ngudi munnangè; ne ewu udi munnangè mèmè nebàmunangè kùdì Taatù wanyì, ne mèmè nēmmunangè, ne nēndimwènèshè kùdīye.*

*Yudà kumwambilayè, kàyi Mpongoloki awu to: Mukalenge, mmunyi mùdìbi ne wèwè neùdimwènèshè kutùdì, kadi kakùyi kùdì bàà pa buloba?*

Mbwena kwamba ne, *kosmos*, “ndongolwelu wa buloba.” Wèwè ne mèyì a kumpenga kwa dibeji, neùmone. Mwànyì mèmè cidì “g” ne cidì cyàmba apa ne, “*kosmos*, anyì ndongolwelu wa buloba.” Ng’ekeleeziya ayì, ne bikwabo byònsò, nwamonu’s.

*. . . Mmunyi mùdìbi ne wèwè neùdimwènèshè wèwè mwine kutùdì, kadi kakùyi kùdìbo bòbò? Mmunyi m’Údì mwa kwenza nanku?*

*Yesu wàkandamuna e kumwambilayè ne: Muntu yéyè munnangè mèmè, yéyè neàlamè mèyì àànyì, (amen) ne Taatù wanyì neàmunangè, ne twètù netùlwe kùdīye, ne netwènzè cisòmbedi cyetu kùdīye.*

*Ewu udi kàyi munnangè kèna ùlama mèyì àànyì to . . .*

Mmufwànyìne kulama mèyì àdì ekeleeziya mwambè’s; kadi lama mèyì àdìYe Yèyè mwambè, wamònu’s.

*. . . ne mèyì anùdì nuumvwa aa kī ngàànyì mèmè to, kadi ngàà Taatù udi muntùme.*

*Maalu aa ngānwāmbidīwu, mpāncidī neenū apa.*

*Kadi Musāmbi, udi Nyuma Mwīmpè, wīkala Taatù mwa kutùma mu dīnà dyànyì awu, yéyè neànùlongèshè maalu ónsò, ne neànùvùlwījè maalu ónsò aa (mbwena kwamba ne, Mèyì Èndè), byònsò bīndī mèmè munwāmbīle abi.*

Mmu kiipàcilà kaayi dībà adi mwàkatùminà Nzambi Nyuma Mwīmpè? Yèyè àswèkù àsakidilè mabènesha Èndè ku Dīyì Dyèndè.

<sup>16</sup> Yesu wàkamba, ne: “Mu ditùkù adi nenùmanyè ne Mèmè ndi munda mwa Taatù, ne Taatù ùdì munda Mwànyì; ne nwènù nudi . . . Mèmè ndi munda mwenu, ne nwènù nudi munda Mwànyì.” Mpindiyewu, bu ne tuvwa twamba nùnkù . . .

<sup>17</sup> Mpindiyewu, vùlukààyi ne, eci nebàcìkwàtè pa mukàbà wà mèyì.

Mwena Kilisto kampànda mwena kantu-ku byanza, wa mu Louisville, mmumbiikilè kwènji katanci mwàmwa. Ne ùvwa wàmba ne: “Mbibi be, Billy, mùdì Mayiisha aa, bu dya bwena diwāmbi mààlabà dilòlò adi, kaàyikù àfika kùdì bantu binunu makumi anaayi muneemu emu to pamutù pàà bantu lukàmà ne makumi ataanu, nkàmà yibidi, anyì nkàmà yisatu mu kaatabernacle keebe kakese aku.”

18 Mêmè kwamba ne: “Mukalenge, mu ngondo yisambombo kuumukila ku mpindyewu, Yesu Yèyè munenge, buloba bujima’s nebâteelejè cyôci eci.” Nwamònu anyi?

Mikàbà ya mèyì ayi yìyaaya pa buloba bujimà, nwamònu’s, mu nyùngulukilu mwònsò. Nenu, ki bwa cinyì, tudi tulongesha kaaba aka mpindyewu anu citùdì twètù twitabuuja ne ki Bulelela, ne citùdì basangàne ne Nzambi mmutùshìndikile ne m’Bulelela aci.

19 Mpindyewu, kiipàcìlà, mmu kiipàcìlà kaayi mùvwà—mùvwà Nzambi mutùmìne Nyuma Mwîmpè? Mpindyewu, ndi muswe nùfunda aci nanku, Yone 14, kubangila ku mvensà wa 14, ne kubala nshapità awu too ne ku ndekeelu, bwa cishìmikidi. Kiipàcìlà kàà Nzambi, mutùdì tusangana kaaba aka, mu kutùmà kwa Nyuma Mwîmpè, kàvwà nkiipàcìla kamwepele, mbwà Nzambi Yèyè mwine kusòmbela mu Ekeleeziya Wendè ne kutùngunukila ne mpàngù Yèndè mu Ekeleeziya.

Mbwena kwamba ne, Nzambi ùvwa munda mwa Kilisto, ùtùngunukila ne mpàngù Yèndè mu Kilisto; ùpàtuka mu Kilisto, ùbwela mu Ekeleeziya, ùtùngunukila ne mpàngù Yèndè mu Ekeleeziya.

20 Mpindyewu, twâmanyi cidi Nyuma Mwîmpè. Twâjandùlù, makèèlèlà dilòòlò awu ne, Yèyè n’Nzambi.

Mpindyewu, patùdì twela meeji bwa Nzambi, Taatù, mùdì Yesu mwambè kaaba aka ne, n’Taatù Wendè; Nzambi, Mwànà, bu Yesu; Nzambi, Nyuma Mwîmpè, mutùdì tuMubiikila leelu bu emu, mpindyewu, kì mbwena kwamba ne kùdì Nzambi bantu-nkàâyà, misunguluke yisatu to. Mbwena kwamba ne kùdì Nzambi umwepele mu midimu yisatu.

Tucyàmbèku mushindu ewu. Cyònsò civwà Nzambi aci, Yèyè wàkaCìpòngolola mu Kilisto, bwalu yèyè wàkaDishìya munda mutupù ne kuCìpòngolola mu Kilisto. “Ne Kilisto ùvwa kaabujimà kàà Bunzambi mu mushindu wà mubidi.” Cyònsò civwà Yehowah aci, Yèyè wàkacìpòngolola mu Kilisto.

Ne cyònsò civwà Kilisto aci, Yèyè wàkacìpòngolola mu Ekeleeziya; kaciyi mu muntu umwepele to, kadi mu Mubidi mujimà. Mwaba awu, mwaba wutùdì tudìsangisha mu bwobùmwe, tudi ne Bukolè. Cyònsò civwà Nzambi aci, civwa mu Kilisto; ne cyònsò civwà Kilisto aci, cidi mu nwènu.

“Bwalu Nzambi wàkavwijiibwa mubidi, ne wàkasòmbela munkaci mwetu.” Timòtè wa Kumpala 3.16, panwikalà nucifùnda. “Kakùyì dikòkangana to bwalu busokoka bwa difwànà dya Nzambi mbunene: bwalu Nzambi wàkamwèneshiibwa mu mubidi, ne twètù twàkaMulenga ne byanza. Nzambi, Yehowah, muvwijiibwe mubidi, ne mwendèle pa buloba, ne twètù baMumòne ne ètù abidi.”

21 Nudi bamanye's, mu nshapità umwèumwè, wa Yone 14 awu, Filipò wákamba ne: "Mukalenge, túleejé Taatù, ne aci necitùsànkìshè."

22 Yesu wákamba ne: "Nkàadi neenu ntàntà mule mushindu ewu, Filipò, kàdi wèwè kùyi uMmánya? Paùdi muMmòne Mémè, udi mumòne Taatù. Kadi bwa cinyi udi uNgambila ne: "Túleejé Taatù?" Nzambi ùvwa muvwijìibwe mubidi.

23 Mpindyewu bwalu mbwòbù ebu. Taatù ùvwa Nzambi kumutù kwenu, mutùdi twamba. Twètù tudikù kubangila kacya ku Adàmà. Nzambi, Taatù awu, ùvwa kumutù kwa Mòsà ne bàna bàà Izaleela, mu Dikunji dya Kapyà. Pashiishe, Nzambi neetu, mu Kilisto; mwendàkàne neetu, muyiikile neetu, mudyè neetu, mulàale pàmwè neetu. Nzambi kumutù kwetu; Nzambi neetu; ne mpindyewu Nzambi munda mwetu. Cyònsò cìvwà Nzambi aci, cyàkabwela mu Kilisto; cyònsò cìvwà Kilisto aci, ncibwelè mu Ekeleeziya.

Ncinyi aci? Nzambi ùkwàcila mudimu munda mwebe. Mwaba kanà wònsò pa buloba wùdiYe muswe kukubiikidila awu, wèwè udi mwaba awu mene, ùkwàcila mudimu munda mwebe bwa kwenza diswa Dyèndè dîmpè. Mushindu mwine wùvwàbi bikèngela bwa twètù kwelakù Nzambi twasàkidila bwa bwalu abu's we! Nzambi, Nyuma Mwîmpè awu, mmutùmìbwe mu kiipàcìlà kàà ne Nzambi ìkalè musòmbèle mu Ekeleeziya Wendè, ùkwàta mudimu mu cikondo ne cikondo cyònsò, ùkùmbaja diswa Dyèndè dya Nzambi.

24 Pàdi bantu bàkuseka wèwè apu, udibò bàseka awu kî ngwèwè to, bàdi bàseka Ewu udi mukutùme. Pa nanku Yesu wákamba ne: "Nudi bàà disànka pàànwàmbà bantu bintu bibi bya mishindu yònsò, bya mafi, bwa Dîna Dyànyì. Nudi bàà disànka." Ne, kabidi ne: "Bònsò bàdi ne nsòmbelu wa difwàna dya Nzambi mu Kilisto Yesu nebàkengeshiibwe."

Bwalu, pààkaDìmanyishà Nzambi mu Kilisto, bòbò's bààkaMukìna. Mbanganyì bààkaMukìna, bya bibi? Ekeleeziya. Ekeleeziya ngwàkaMukìna, bya bibi. Bòbò mbààkaMukìna bibi kutàmba ne—ne bakwàciki bàà maala. Bòbò mbààkaMukìna bibi kutàmba ne bakwabo bantu bònsò abu. Ekeleeziya ngwàkaMukìna. Pa nanku, ki bwa cinyi, panùdi numòna *kosmos*, "Ndongolwelu wa buloba, bàà pa buloba kabààkaMumanya to," mbwena kwamba ne, "ekeleeziya," wa ku dîna awu, "kààkaMumanya to. Yèyè wàkalwa kùdi bàà Kwabo, kadi bàà Kwabo kabààkaMwakidila to."

"Kadi bònsò bààkaMwakidilà abu, Yèyè wàkabàpèèsha bukolè bwa kulwa bàna bàà Nzambi, aba bààkiitabuujà Dîna Dyèndè abu." Kaa, mushindu mwine wùvwàbi bikèngela bwa twètù kuMunanga ne kuMukuukwila's wè! Kiipàcìlà kàà Nzambi, muswe bwa kulwa mu bwobùmwè!



<sup>25</sup> Mbyenze bu, kumpàlà kwa twètù kuumuka ku bitwàbadi abi, twánjàayi kukwàta mudimu ne eci nunku; mu matùkù a Luutà, mu mukenji wa bupikudi, pàakashiyà Naòmì ditùngà, bwa diteeta, bikondo bikolè. Kuyayè mu ditùngà dya beena Moàbà, bàvwà anu civùmvù abu, beena Kilisto bàà ku dîna. Bwalu, beena Moàbà bàvwà bafùmine ku mwànà wa bakàji wa Lotà, ne bôbò bàvwà beena kwitabuuja bàà ku dîna, ne basambàkàne. Ki pashiishe bayendè kufwàye, ne bânà bèndè bàà balùme babidi kufwàbo. Ki mu njila wa dyalukila kwabo, Naòmì. . . Luutà ne Naòmì, mu njila wa dyalukila kwabo awu, wendè. . . Umwe wa ku bakàji bàà bânà bèndè, Opà, kwambayè ne ùvwa muswe kwalukila ku ditùngà dyèndè, kùdì nzambi yèndè, ne ekeleeziya wèndè, ne cisàmba cyèndè. Kàdì Naòmì kuteetayè bwa kwenzeja Luutà bwa kwalukilayè, kàdì yèyè wàkamba ne: “Cisàmbà cyebe ncisàmbà cyànyì. Nzambi webè n’Nzambi wanyì. Pawàfwila apu, ki pàngààfwilà. Pààkujiikilàbo apu, ki pànjiikilàbo. Nenku mèmè ncyàkwalukilakù to.”

<sup>26</sup> Ki pàkaadi muntu mubàkùle lumònu mpòpò apu. Cìvwà cyèndè cisàmbà cyambè nansha ciikàle cinyi ne: “Wèwè’s uyààya kuntwaku bwa kashààla munsantu mubùnguluki wa mu malaba anyì cintu kampànda.” Aci kacìvwà ne cìvwàci cìshintulula nansha bwa Luutà. Kùvwà kiipàcìlà kàvwà Nzambi muswe bwa kuulakù.

<sup>27</sup> Ne anu mùdì cya bushuwa ne nzala ya Nyuma Mwimpè dilòòlò edi amu, ncintu kampànda munda mwebe, ciikàle cikòka, bwalu kiipàcìlà kampànda kàà Nzambi mu nsòmbelu webè bikèngela bwa kàkumbajiiwbè, anu mwàkadibi bwa Luutà amu.

<sup>28</sup> Bwalu-bulonda ebu’s mbulenga bulayà! Ncyèna anu mwa kuumukakù to, bwa katanci. Nwènu’s nudi bamanyè mukenji wà bupikudi, wà ne pàvwà Boàzà-. . . Nudi bamanyè bwalu-bulonda bwa mùvwà Luutà ùpumbulula mu budimi amu ne mwàkalengeleelàye Bowàzà. Ne kumpàlà kwa yèyè ewu kupetayè mushindu wà kumusèla, bìvwà bikèngela bwa kupikulayè byònsò bìvwà Naòmì mujimije. Ne umwepele uvwakù mwa kupikula bìwà Naòmì mujimije, mu mukenji wà bupikudi, ùvwa ncilongo cya mu dîsù; bìvwà bikèngela kwikalabò bilongo kumpàla kwa kupetayè mushindu wà kupikula. Ne yèyè nguvwa cilongo cìvwà citàmbe kwikala cya mu dîsù. Nenku bìvwà bikèngela bwa kwenzayè cimanyinu cya bantu bitwilàngàne, pambèlù pàà ciibi cya cimenga, anyì dijikula dya bantu bitwilàngàne dya ne yèyè nguvwa mupikùle byònsò bìvwà Naòmì mujimije. Ki Bowàzà kucyènzayè pa kuvùula kwa cisàbaatà cyèndè kumpàlà kwa bakùlù, ne kwambayè ne: “Kwòkù kampànda mwab’ewu udi ne cintu kanà cyònsò cidì cya Naòmì, leelu ewu mèmè ngàcipikùlù.”

<sup>29</sup> Ne mushindu awu ki wàkenzà Nzambi, mulondè mikenji Yèndè Yèyè mwine. Nzambi kènàku mwa kulonda, kukupèèsha wèwè mukenji kampànda bwa ùwùlondè kàdì Yèyè ùlonda

wa cyanààna to. Yèyè ùdi ùlonda mikenji Yèndè Yèyè mwine. Pashiishe, Nzambi bwa kupikula ekeleeziya mujimine, buloba bùvwà bujimine, bufùki bùvwà bujimine; Nzambi, Yèyè udi kàyi ne mikàlù mu Nyuma awu, bwa kupikula bukwàbantu bùvwà bujimine, Nzambi wàkalwa Yèyè mwine cilongo, Muntu, Mwànà uvwaYè mufùke munda mwa Màriyà. Ne pashiishe kwenzaYè cimanyinu, anyi bujaadiki; pambèlù pàà biibi bya Yèlusàlèma, Yèyè wàkabàndishiibwa pankaci pàà maulu ne buloba, ne wàkafwà, ne wàkapikula bintu byònsò. Ne mu kutùukà kwa mashi, Yèyè wàkajidila Ekeleeziya bwa Yèyè mwine kusòmbelamù, ne kwenza bwobùmwè ne kuyiikilangana nendè, kaaba kàà bwobùmwè kàvwà kajimine kàà mu budimi bwa Edènà aku mùvwà Nzambi ùtùuluka dilòòlò dyònsò, pa dîbà dya kuya mu ekeleeziya.

Nukààvwakù bamòne anyi? Nzambi ùvwa ùtùuluka mu citaleela cya ditùku, pa dibwela dya dîbà. Kùdi cintu kampànda pàkaadi bufùku bùbanga kwila, bantu bàdi bàtùma meeji ku ekeleeziya ne kùdi Nzambi; beena Kilisto. Paùdì umona dîbà dibwela, wèwè udi umanya ne dyebe dîbà didi pààdì munkaci mwa kubwela.

<sup>30</sup> Nenku mu citaleela cya dilòòlò yèyè ùvwa ùtùuluka ne ùyiikilangana naabò. Kadi mwaba awu ki wàkajimijàYe bwobùmwè abu, bwalu mpekaatu kàvwà mwa kuMupèèsha mushindu wà kucyènta to.

Ki pashiishe kuvwijiiibwaYè mubidi ne kusòmbelaYè munkaci mwetu, bwa Wàmòna mwa kwalukila cyàkàbidi kùdi muntu, ne kusòmbela mu muntu, ne kwalujulula muntu mu ngiikàdilù wa bwobùmwè Nendè cyàkàbidi, ne kumupèèshulula bukenji bwèndè bufila kùdi Nzambi. Ki cyàkenzàYe ncyòci aci.

<sup>31</sup> Ki kiipàcila kàà Nyuma Mwîmpè nkòkò aku. N'Taatù, cyàkàbidi, Nzambi Taatù ùsòmbela munda mwebe wèwè, ùkumbaja mpàngù Yèndè, bwa kujikija mpàngù Wèndè wa bupikudi; ùkwàcila mudimu munda mwebe, ùkuvwija mukwàci wa mudimu pàmwè Nendè; ùkupèèsha kaaba kampànda, ùkupèèsha cya dyenza bwa mwanèènu wa balùme ne mwanèènu wa bakàji bàdi badishinde; ùkupèèsha Nyuma Wèndè ne dinanga Dyèndè, bwa kuya kakèbangana ne bajimine, bu mwàkenzaYe mu budimi bwa Edènà. "Adàmà, Adàmà udi penyi?" Ki cidì Nyuma Mwîmpè wènzela muntu mulùme anyi muntu mukàji ncyòci aci. PàdìYe anu ùfika mu mwoyi wèndè ne wàngata cisòmbedi Cyèndè, kùdi nyòòtà ne nzala bwa misuùkà mijimine.

Ki lutàtù lùdiku leelu ewu ne masangisha ndwòlò alu. Kamwèna dilengiibwa dya kùdi Nyuma bùngi bukumbàne to, bwa kuya kwenda kukèbangana ne misuuka ya bàdi bajimine ne bàdi bàpunga ne lufù. Mbitàmbe kwikala anu bwa kudìpetela lumù, anyi ekeleeziya, anyi citanda, anyi dingumba, pamutù

pàà ndongamu wa dipeta dya misùukà. Bya luse be! S'tudi bafwànyine kushàalapù bikolè.

Nzambi wàkaDipòngolola mu Kilisto. Menemene.

<sup>32</sup> Kilisto wàkaDipòngolola mu Ekeleeziya. Ki bwa cinyì, tàngilààyaaku mpindyewu: “Mu ditùkù adi nenùmanyè ne Mémè ndi munda mwa Taatù, ne nwènù nudi munda Mwànyì, ne Mémè munda mwenu. Mu ditùkù adi mmunwàcimanyà.” Bwalu, bìdì ne, cintu cyònsò mu kaabujimà cìdì nndongamu wa bupikudi udi utùuluka, Nzambi awu wàlukila bwa kusòmbela mu, ne kusòmba pàmwè ne, ne kuyiikilangana ne bantu Bèndè, mùvwàYe wènza ku cibangidilu amu.

Mpindyewu, díbà adi, pàdìYe anu ne wàfikishì Ekeleeziya Wèndè mu ngiikàdilù ya dyakula nende, ùfikisha Ekeleeziya Wèndè pa kaaba kaa Yèyè mwa kupòngolokelamù, ne ùnanga, ne ùswishisha, ne wènza bwobùmwè, díbà adi nekùlwe Edènà. Yèyè neàpingajè Ekeleeziya Wèndè mwaba wàkaMushiilaYe–Yèyè, ùmupingaja cyàkàbìdì ku Edènà, mwaba wàkadishindilàYe awu. Yèyè, mpindyewu. . . Mwaba awu ki wàkenzelàYe dibanga Dyèndè dya ntwàdijilu, anyì cibulà. Mwaba awu ki wàlujiibwàYe cyàkàbìdì, mwikàle ne dibaya dyònsò dya kufùndila dya bupikudi dikùpula bimpè, ùbàaluja cyàkàbìdì buludì ku wòwò mwaba awu.

<sup>33</sup> Ekeleeziya ùdi pa buloba kùkaadi cikondo kampànda. Nenku Ekeleeziya, mu bulelèlè, paanyimà pàà Dilongolola, dya bidimu cinunu ne nkàmà yitaanu bya bikondo bya midimà. . . Luther nguvwa mulongolodi wa kumpàla bwa kupàtuka paanyimà pàà cipungu cya bapostolo. Nenku díbà adi pààkapàtukà Luther, Nzambi wàkamacisha ndambu mukese wa Nyuma ne wàkaMupòngolola pa Ekeleeziya, mu dibingishiibwa. Ne pashiishe mu matùkù a Wesley, Yèyè wàkapòngolola ndambu mubàndile kakese wa Yèyè mwine, mu dijidiibwa. Nenku pààlu cikondo kutùngunuka, too ne ku cikondo cya nshìikidilu, Nzambi mmutùngùnuku ne kuDipòngolola mu Ekeleeziya Wèndè. Kènzakanàayi anu ku nseke yònsò bwa numòne ní m'Bulelèlè, anyì ní kì mbwòbù.

<sup>34</sup> Tàngilàayi cikondo cya ba-Luthériens, nwènù bàdì bàbalà maalù-malonda, tàngilàayi ditàbuluja dyabo ne byàkenzàbo. Tàngilàayi mùvwà ditàbuluja dya Wesley ditàmbe bunene menemene, mùvwà bukolè bùvwàbo naabù butàmbidile, kadi biikàle banyàabanyà. Tàngilàayi mu matùkù a Mpenta, ditàbulujà òvwàbo naadi musangu awu, divwala bunene kaayi, dyalàbàle.

<sup>35</sup> Kabidi, *Mutùkumbudi Wa Mu Dyàlumingu*, cibejibeji cya beena Katolike aci, citondè cyàmba ne beena Mpenta mbapàtùle bantu mùliyò mujimà ne binunu nkàmà yitaanu mu cidimu cimwè bàdì bakùdimùne mucìma, benzè kutàmbe ne ekeleeziya mikwabo yònsò misanga ntete. Katolike yèyè wàkashintula,

wàkamba, anu bwa mùliyô wumwe. Mu *Mutùkùmbudi Wa Mu Dyàlumingu* wabò bôbò biine awu amu, cibejibeji civwà cibìikidiibwà ne *Mutùkùmbudi Wa Mu Dyàlumingu* aci, bàvwa bambè ne beena Mpenta bàvwa babàtàmbe búngì.

Ne, vùlukàayi ne, dikudimwisha dya mucimà dya beena Mpenta adi òvwa ndikudimwisha dya mucimà dya bantu bùle tètè ne Nyuma Mwímpè. Biikàle banyààbanyà, ku mbangilu, kumpengà kwa kajila kampàndà kwàka, biikàle ne cindaalà cya—cya kale. Ne bakàjì kabàvwa mene mwa kupeta mushindu wà kusùmbakù nansha nshèsheetè ya mu cifùka to. Bàvwa bàshààla mu njila ya njanja mwàmwa, bènda bàngulula matalà ne bààpela, ne bènzela bàna baabo balela mampà. Kadi mbikafikè ku cinyi? Ekeleeziya mutàmbe bukolè mwimàne pa buloba leelu ewu, kakùyì ku mèsù a bàà pa buloba to, kadi ku mèsù kwa Nzambi, bwalu Yèyè ùdi ùcìjaadikila ku bìdìYe ùbènzela. Yèyè ùdi uDìpòngolola munda mwabo, ùCìpòngololamù.

<sup>36</sup> Mònaayi mpindyewu cìdi cyenzèke, Nzambi mwikàle uDìpòngolola munda mwabo. Mpindyewu Ekeleeziya mmufikè pa mwaba kampànda, kubangila ku Luther, Wesley, ne ditàbuluja dìdi dyènzeka too ne ku Mpenta; ne dibwelè mpindyewu mu cikondo citùdi tufika mpindyewu eci, ku Nyuma Mwímpè umwèumwè awu, cibì Yèyè awu mwikàle wabúngì kupìta. Mpindyewu, ba-Luthériens abu pàakasungidiibwàbo kale wàwa, bàakapeta citùpà cya Nyuma Mwímpè. Pàakajidiibwà ba-Méthodistes, civwa mmudimu wà Nyuma Mwímpè. Nwamònu's, civwa ncitùpà cya Nyuma Mwímpè. “Twètù katùyìku to bôbò kabèèna mwa kuvwijiibwa bapwàngàne nansha,” mùdi Mifundu yàmba. Nwamònu anyi?

<sup>37</sup> Mpindyewu, Nzambi, bu mùdi Bukènkè bubangè kukenkesha mu matùkù a ndekeelu, mMutèkèmenè kutùdi twètù, cintu cinènè. Bwalu, “Kùdi byàbúngì bifidiibwe, ki kùdi byàbúngì bilòmbiibwa.” Pa nanku Yèyè nealombè byàbúngì menemene kutùdi twètù kutàmba byàkalòmbaYe kùdi ba-Luthériens anyi kùdi ba-Méthodistes, bwalu twètù tudi twendela mu Bukènkè butàmbe bunene, biikàle ne Bukole butàmbe, biikàle ne bujaadiki bunene. . . bu—bunene kutàmba buvwàbo bôbò naabù. Mpindyewu, tudi twètù ne bujaadiki bwa dìbìshibwa dya ku lufù butàmbe bunene. Tudi twètù ne bintu bishindàme, bya bitwìshùbwe kutàmba bìvwàbo naabì bôbò.

<sup>38</sup> Kadi bìdi anu mùmvwà mwambìle beena cilongelu citumbùke cya ba-Luthériens, kí nkwanji kwenza ntàntà mule to.

Bàvwa bàmba ne: “Citùdi twètù aba naaci ncinyi?”

Mèmè kwamba ne: “Muntu kampànda wàkakùna budimi bwa matalà. Tubèjì tukese twa kumpàla tùpàtuka, ki kwambayè ne: ‘Twasàkidila Mukalenge bwa—bwa matalà!’ Mu mushindu

mushààdile yéyè ùvwa nawù, kadi yéyè ùvwa nawù anu mu mmwènekelu wa ntwàdijilu cyanààna. Abidi mmale asatu mmîpi, kulwaci cikolakola.”

Ki munyamvudi kupàtukawù lwà kuulu aku, cìvwà ba-Méthodistes.

<sup>39</sup> Bu nwênù mwa kutàngila bufùki, nenùmonè Nzambi ùkwàta mudimu. Kùdi mùnsokòntù wùsanganyiibwa muntwamu wùdi mene wùya pàmwè ne mudimu wányi wà bwambi. Nwamònu anyi? Bìdi ne, panùdi nutàngila bufùki, numòna mùdìbu bwènza, cikondo ne dîbà, nudi mwa kumòna mwaba wunùdi ne mwoyi. Tàngilàayi cikondo.

<sup>40</sup> Mpindyewu, dîbà adi, ba-Méthodistes, bôbò bàvwa minyamvudi. Bàvwa bàtàngila paanyimà kùdi ba-Luthériens, bàmba ne: “Twètù tudi ne dijidiibwa; nwênù kanwènaMù ne kantu nansha kamwe to.”

Abidi mmale asatu mmîpi, kuumukila ku bungungu abu, kuumukila ku ba-Méthodistes, kupàtukakù lutete lwà. . . kabèji kàà ditalà. Aci ki cìvwà Mpenta.

Ki bwalu mbwòbù abu, dibingishiibwa, citùpà cyàCì cìmwè. Dijidiibwa, cikwabo citùpà cyàCì. Nyuma Mwîmpè, cikwabo citùpà cyàCì; Mpenta. Luther, Wesley, Mpenta.

<sup>41</sup> Mpindyewu Mpenta udi wènza cinyi? Ndi ncìfwànyikija, bwalu, mu Mpenta, cyàkaaluja, kî ndibèji dibishi to, kî munyamvudi to, kadi. . .

Ditalà kadyèna mwa kwambila munyamvudi ne: “Ncyèna ne cya dyenza neebe” to. Anyi, munyamvudi kawèna mwa kwambila di—dibèji ne: “Ncyèna ne cya dyenza neebe” to. bwalu mwoyi wumwewumwe wùvwà mu dibèji awu ngùdi mwenze munyamvudi. Mwoyi wumwewumwe wùvwà mu munyamvudi awu ngùdi mwenze mwepu.

Ne ekeleeziya wa ba-Luthériens ngwàkenza ekeleeziya wa Wesley. Ekeleeziya wa Wesley ngwàkenza Mpenta.

Kadi, Mpenta, ùdi cinyi? Ndyalujulula dya lutete lwôlu lumwelumwè lùvwà luyè mu buloba ku cibangidilu alu, lwikàle lwaluja kaabujimà kònsò kàà Bukolè bwa Mpenta, ku dibàtiiza dya Nyuma Mwîmpè, nwamònu’s, mu matuku a ndekeelu. Kaa, s’ncintu cinènè cya dikèma’s, cya kutàngila, cya kwitabuuja ne kutàngila.

<sup>42</sup> Mpindyewu mu cikondo citùdi twètù ne mwoyi mpindyewu eci, ncipite Mpenta.

Mpenta mmuditèèke mu malongolodi, ne mubangè kutentula bikolè menemene malongolodi ne: “Twètù tudi *cikampànda* ne tudi *cikansanga*.” Aci’s cìdi anu bufùki. Kanwèna anu mwa kupanga kucyènza to. Mbufùki. Bôbò’s nebàcyènzè. Cìdi ndongamu, bwa bôbò kwenza nanku.

Kadi Ekeleeziya mmutùngùnùke. Mmubwelè mu bukolè butàmbe bunene, butàmbe búngi. Ndyalujulula dya mapà.

Kàdi beena Mpenta bààbúngi kabèena biitabuuya dyondopa dya kùdi Nzambi, mudimu wà bwambi wà Banjelo, ne makolè a Nzambi awu to. Beena Mpenta bààbúngi bàdi bàbiikila bikèènà-kumòna bìndi mèmè mmòna ebi ne, “ndyabùlù.” Malongolodi àbúngi kí mmaswe nansha kwikala naaCi bwalu to, mwine mu Mpenta amu. Nwamònu’s, twètù tudi batentèmùke bayè bapite apu. Anu mùvwà ba-Méthodistes babiikile beena Mpenta ne, “mbapàle” amu, bwa dyakula dya mu myakulu. Anu mùvwà ba-Luthériens babiikile ba-Méthodistes ne, “mbapàle” amu, bwa dyela dya mbilà. Nwamònu anyi?

Kadi byònsò abi ndilwa dya Nyuma Mwimpè, mu nushindu wà ne Ekeleeziya munene ùdi munkaci mwa kuujiibwa tètè, ne kupacishiibwa patapata awu, aleluuyah, ne makolè manene a Nzambi wa Bukolè bwònsò. Mu mushindu wà ne, mmukafikè mu mwaba wà ne byenzedi mene byàkenzà Yesu abi bidi munkaci mwa kumwèneshiibwa mu Ekeleeziya mpindyewu. Tukàadi pabwipi, balundà bàànyì.

<sup>43</sup> Ngǎnji ngìmanè kaaba aka, bwa katanci kakese cyanààna, bwa kupeta cìvwà Nzambi mutèèkèle Nyuma Mwimpè mu Ekeleeziya, nnupèèshèku cìfwànyikijilu cikwabo bwa nùmanyè. Kale wàwa mu Dipungila Dikùlukulu, pàvwà mwâ—mwànà . . .

Muntu ùvwà wènza dîkù dyèndè. Ûvwà ùsèla mukàji, aci ki cintu cya kumpàla.

Pashiishe ùvwà ùlwa muntu munene, byenzè bu bulongolodi kampànda. Bìvwà bìmpè.

Cintu cìvwà cìlondà cìvwà cyènzeka, kùvwà kùlwa dileediibwa mu dîkù adi. Apu mpàdi Nyuma Mwimpè, nwamònu’s, nyuma kampànda mukwabo ùbwelamù, ùvwà mwikàle mwànà wa balùme. Mwànà wa balùme awu, kàvwa mwambùle bujitu mu kaabujimà to, anyì kàvwa mupyànyì to too ne pàvwàye ùfika pa cipimu kampànda. Kadi bìvwà bìkèngela bwa kwanji kushindikiibwayè, dyàmbedi. Eyowa.

Ne pashiishe bàvwà ne mukenji wà ditèèkiibwa. Bwenu nwènù bambi, “dishikikiibwa dya mwànà wa balùme,” kí dîndi ngamba mpindyewu edi, nwamònu’s, pashiishe pàvwàye ùfika pa cipimu cya yèyè kutèèkiibwa. Yesu wàkafila cìfwanyikijilu cilenga cya cyòci aci, pa Mukùna wà Dishintuluka dya mpàla.

<sup>44</sup> Anu mùngambì ne, Nzambi kàakuya pambèlù pàà mikenji Yèndè bwa kwenza cintu kanà cyònsò nansha.

Wèwè ne ciinà cya màyi a kazeeze pa *aka* kakùnà, cìfùkusha màyi mu lupeepèlè mwònsò, ne pa kakùnà kakwabo *aka*, wèwè mwikàle ne bya pa madimi munkaci mwa kuuminyina, udi mwa kushàala mwimane pa aka kakùna wela mbilà ne: “Kaa, wèwè màyi, pwekèlà lwà kùneeku ùlè mu bya pa madimi byànyì! Kaa,

wêwè mâyi, ndà mu bya pa madimi byànyi!” Kaàkuyakù to. Kadi wêwè ukwàta mudimu bilondëshile mikenji ya dikòkiibwa dya kùdi buloba, udi mwa kwela mâyi pa bya pa madimi abi.

<sup>45</sup> Wêwè ne mubèèdi mulàadika kaaba aka, anyi ngènzàmpèkààtù mulàadika kaaba aka, anyi muntu udi muswe kudilongolola, udi kàyi mwa kulekela dinwà dya maalà, kàyi mwa kulekela dinwà dya mfwankà, kàyi mwa kulekela dyalakana ne bikwabo. Bu wêwè anu mwa kukwàta mudimu bilondëshile mikenji ya Nzambi, kwenza bwa Nyuma Mwimpè àbwelè muntwamu, díbà adi yèyè kàcyèna kabidi muntu wa yèyè mwine to. Yèyè, neimanyikè cintu aci, bwalu Nyuma Mwimpè ùdi ùmwangata ku bukòokeshi Bwèndè. Kadi bidì bikèngela bwa wêwè kukwàta mudimu bilondëshile mikenji ya Nzambi, tunungu twà Nzambi.

<sup>46</sup> Mpindyewu, mu Dipungila Dikùlukulu, pàvwà mwànà wa mu díbòko ewu ùlediibwa, bàvwa bàmutàngila, bwa kumòna mùvwàyè ùditwàla, diditwàla.

Dìbà adi taatù, mwikàle mwena kantu-ku-byanza munene mu ciine cikondo aci, pàmwàpa mwikàle ne bidimu bya mu makumi anaayi, anyi makumi ataanu, kàyi ne díbà dya kolongesha mwànà awu to, yèyè mwine, pa nanku ùvwa wàngata. . . Mu matùkù awu kabàvwa ne túlaasà twa bantu bònsò mùdibo naatù mpindyewu emu to, pa nanku bòbò bàvwa ne civwàbo bàbùikila ne “ndeji,” anyi “mukoleshi,” mulongeshi wa kàlaasà. Nenku mulongeshi wa kàlaasà ewu ùvwa wa mutàmbe bwimpè uvwayè mwa kupeta, mu mushindu wà ne ùvwa mwa kwikala mwambi wa bulelèlè ne wa wàmabila taatù awu bulelèlè pa bwalu abu.

<sup>47</sup> Ne pashìshe pàvwà mwànà wa balùme ewu ùfika pa cipimu kampànda, twàmbè ne, ùlwa mubobè. Mwànà wa balùme awu yèyè anu muntu mupidyè diitabuuja, kàyikù mwimpè to, kàyi ùcyùka maalu a taatù to; cyèndè pèndè cyònsò civwàyè wèlela meeji anu kunàya ne bakàji ne kulàala naabò, anyi—anyì kunwà kwa maalà, anyi kunàyà kwa twarta twà mfrangà, anyi kwenza kwa manàyì a ditembangana a pa kabalù; awu mwànà wa balùme ùvwa mufwàngu yònsò mufwàngyine kwikala anu mwànà’s, kadi kàvwakù ushikikiibwa pa kaaba bwa kwikala mupyànyi wa byònsò bìvwà naabi tatwèndè to.

Kadi yèyè mwikàle mwànà wa balùme mwimpè, ne mudifile ku maalu a taatù, ne ùjaadika ne mmwànà mujaalàme, díbà adi bàvwa bènza mushingà kampànda. Bàvwa bàpàtuka ne mwànà wa balùme awu mu mùsèèsù ne bàmuvwàdika mùzàbì mutòòke, ne bàmushikika kuulu pa cibùmbà bwa beena mu cimenga bònsò kumònabò. Bàvwa bènza fètè ne bàtwa cyanga, ne taatù ùvwa díbà adi wènza mushingà wà ditèèkiibwa. Ùvwa ùtèeka mwanèndè mulela wa balùme awu mu mishinga yèndè sungasunga, nenku díbà adi mwànà awu ùvwa mulongo wumwe

ne tatwëndè. Mu ngaakwilù mukwabo, bu ne bìvwa ndeelù ewu, dínà dya mwànà awu pa kabèjì kàà shekè òvwa menemene anu mwomumwe ne dya papa wendè.

<sup>48</sup> Mpindyewu tàngilààyaaku numòne cyàkenzà Nzambi. Pààkalediibwà Mwan'Èndè, WàkaMulekela ùkafika too ne mu bidimu makumi asatu, ùMuteeta, ùMupima. Pashiishe kuMupèèshaYè bidimu bisatu bya diteeta dikolè. Ki pashiishe paanyimà pàà diteeta dikolè adi, pààkamònàYe ne Mwan'Èndè ùvwa mudifile ku maalu a Taatù; Mukùnà wà Dishintuluka dya mpàla, Mukàndà wà Luukà; Wàkangata Peetèlò, Yakòbò, ne Yone, bantèmù basatu, ne Wàkabànda ku lusongo lwà mukùnà, ne kwòkù aku Nzambi wàkenza mikenji ya ditèekiibwa. Yèyè. . . Bààkabàndisha mèsù ne bààkamòna Yesu, ne bilàmbà Byèndè bibàlakana biikàlè bitòòke bu mukenyi. Ne pààkaMubwikilà Ditutu, ki Dìyì kupàtuka mu Ditutu amu, dyàmba ne: “Ewu m'Mwan'Àanyì munanga; nùMutèlèlèjaayi Yèyè. Mèmè nèngìkalè mpindyewu musòmbe ncìciyi kabidi ne cya kwamba to. CìdìYe Yèyè wàmba aci ki mukenji ne Bulelèlà.”

<sup>49</sup> Mpindyewu ekeleeziya mmupicìle mu bilongelu abi. Mmubwele mu dibàkà kale wàwa, kùkaadi ntàntà mule, ne mulwe òngumba, bulongolodi kampànda. Kadi, nudi numòna's, Dilediibwa nditwàle dyòdì cikwabo cintu kampànda. Kadi mpindyewu mmukafikè mu kaaba kàà ne ekeleeziya wa Mpenta, ne Dilediibwa dya cyàkàbìdì, mmuteeciibwe ne mwediibwe ku cipimu, kadi patùdì twakulangana apa ùkaadi ùfika pa kaaba kampànda. . . Nzambi kèna ùtàngila bwalu bwa Ekeleeziya anu bu bulongolodi nàka to. Kèna ùtàngila bwalu bwa Ekeleeziya bu ka—kasùmbù kàà bantu nansha.

Ùdi ùtàngila bwalu bwa Ekeleeziya bu bantu-nkààyà, muntu-nkààyà mu Ekeleeziya. Kadi mpindyewu ùkadi mufikè mu cikondo. . . Ne cyòcì ciine kì mmùsokòntù to; tudi bònso tucimòna. Pàdì muntu ùjaadika, ne Nzambi ùmunanga, Yèyè ùdi ùpàtuka nendè mu mwaba kampàndà wà pàà Nkààyèndè. Kwòkù aku kumpàlà kwa Banjelo Yèyè ùdi wènza cintu kampànda bwèndè yèyè. Kwòkù aku Yèyè ùdi ùmubàndisha kuulu mu Bwikadi bwa Nzambi, ne ùmupàya ne mapà, ne ùmuuja, ne ùmushikika. Ki cikondo citùdì ne mwoyi ncyòcì aci.

<sup>50</sup> Nyuma Mwìmpè umwèumwè wàkasùngila ba-Luthériens awu, wàkajidila ba-Méthodistes awu, wàkabàtiiza beena Mpenta awu, ngudi utèeka mu bulongàme Dilwa dya Mukalenge Yesu mpindyewu awu. Dìbà adi, neikalè ne bukolè bwa kanzèkelè, Mubidi awu, newùbwelè mu Cisùmbù eci, Ekeleeziya, cyàkòkà bakwabo abu ne kubàpàtula mu lukitá. Nèkwènzèkè dìbìikà dya ku lufù. Ki bwa cinyì Nyuma Mwìmpè ùdikù. Nyuma Mwìmpè ncinyì? “Twètù katùyikù bòbò kabèèna mwa kuvwijiibwa bapwàngàne to.” Bàvwa ne mwoyi mu ditùkù kampànda, mu cyòcì aci. Tudi twètù ne mwoyi mu dikwabo ditùkù.



“Mwena lukunà pààlwàye bu nkwaka, Mémè. . .Nyuma wa Nzambi neàjuulè dìbèndelà bwa kumulwisha.” Nwamònu anyi? Tudi mu ditùkù mpindyewu. . .

<sup>51</sup> Kale wàwa, kabàvwa ne meeji matwè nansha mu cyàbibìdì cìmwè cya leelu ewu to. Kabàvwakù mwa kwenza bómbe bwa mushinda anyi màshinyi a kadyendelandelà to. Kabàvwakù ne maalu a mamanya ne bikwabo mutùdì twètù naabi mpindyewu emu to, kadi, anyi bintu bya kabiyi byùmwwika ebi to; bwa kuteeta kwamba ne muntu ùvwa mutaayike, ku lupwishi kampànda ne bikwabo, ne bènza ditaata kampànda ne bàteeta bwa kucijaadika, bwa kuvwija bantu bàlwa beena dyabùlù.

Kadi mpindyewu ewu, patùdì naaCì dijinga, Nyuma wa Nzambi ùdì ùjuula dìbèndelà. Ncinyi ciine aci? Yèye ùdì munkaci mwa kupòngolola Nyuma Wendè. Dìbà adi, aba bàdì biikishe mu nkità mwàmwa abu, anyi mwìnshi mwa cyoshelu cya Nzambi, mùdì Mufùndù wàmba, bàdì bèèla lubìla ne: “Too ne ku dìbà kaayi, Mukalenge? Too ne ku dìbà kaayi? Too ne ku dìbà kaayi?” Nzambi mmungindile mémè ne wèwè. Ekeleeziya mmungindile mémè ne wèwè. Cikondo cya ditèekiibwa, pàdì Nzambi mwa kutùpòngolwela kaabujimà Kèndè, Bukolé Bwèndè, dibìkà Dyèndè dya ku lufù, bya Ekeleeziya ne Kilisto bàshàala bafwànàngàne mu mushindu wà Kilisto ùlwa wa ùmwèka ne mèsù munkaci mwetu, ne ùjuula bafwè, ne twètù tuya mu Dyambwibwa.

<sup>52</sup> Mpindyewu netwámbe, netùleejè paanyima pàà katanci ne, anu aba bàdì bùle tètè ne Nyuma Mwímpè ki bàya mu Dyambwibwa adi. “Bwalu bafwè bakwabo kabààkiikala ne mwoyi to munda mwa bidimu cinunu.” S’neya bushuwa. Anu bantu bàvwà bùle tètè ne Nyuma Mwímpè ki bàakayà mu Dyambwibwa. Mpindyewu, Nzambi mmufile Nyuma Mwímpè. . .

<sup>53</sup> Ndi ne mukwabo Mufùndù kaaba aka, mu Yone 14.12. M’Mufùndù wùdì bantu bònsò mu tabernacle ewu bamanye bìmpè.

*Bulelèlà, bulelèlà, ndi nzwàmabila: Ewu udi ungiitabuuja mémè. . .*

Mpindyewu, kanùlekedikù mwakù awu “ungitabuuja” wùnùpangisha to. Mu ekeleeziya wa ku dìnà, bàdì bàmba ne: “Eyowa, ndi ngiitabuuja. Cya bushuwa, mémè ndi ngiitabuuja ne Yesu Kilisto m’Mwànà wa Nzambi.” Dyabùlù’s ùdì wìtabuuja cintu anu cyòcì cimwimwe aci. Neya bushuwa. Bible mmwambe ne ùdì wìtabuuja.

Kadi Mifùndù yìdì yàmba, mu Yone, ne: “Muntu nansha umwe kèna mwa kubiikila Yesu ne n’Kilisto, kakùyi ku Nyuma Mwímpè to.” Wèwè, mu bushuwa bwa bwalu, ku Mifùndù. . . Ngánjì ngiimanè ndambu kaaba aka, kumpalà kwa kujikija

kubala. Kwêna mukùdimùne mucìma paùdi kùyi mupetè Nyuma Mwímpè to. Aci ncyá bushuwa.

<sup>54</sup> Udi witabuuja “bwa.” Nyuma Mwímpè mmwakùle neebe, ne wêwè wâMujikulu patòoke. Dyabùlù ùdi ne cintu cimwecimwe aci. “Ndi ngiitabuuja ne Yèyè m’Mwânà wa Nzambi.” S’ki cìdì dyabùlù pèndè wènza. Kadi wêwè udi wenda mutàngile kùdiYe.

Bidi ne, Peetèlò wàkabiikidiibwa ne kubingishiibwa, mu kwitabuuja Mukalenge Yesu Kilisto; ne mu Yone 17.17, Yesu kumujidila ku Dìyi, bwalu Dìyi òvwa Bulelèlà. Ne Yèyè nguvwa Dìyi adi. Kumpàla, Yone ùdi wàmba ne: “Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi. Ne Dìyi dyàkavwijiiibwa mubidi, ne dyàkasòmbela munkaci mwetu.” Yèyè ùvwa Dìyi, pa nanku Yèyè wàkabàjidila. KwambaYè ne: “Taatù,” wàkula ne Nyuma uvwa munda Mwèndè, “Ndi Mbàjidila ku Dìyi,” Yèyè mwine, ku dibàtentekela dya byanza. “Dìyi Dyebe m’Bulelèlà.” Mwakùle anu nùnkù Pèndè kwikalakù, mu difù dya muntu mukàji; kaa, kabiyi mwa kwenzekakù to bwa kwikalaYè múngà mushindu wà kaciyi bya Dìyi dya Nzambi òMumwèneshá. “Ndi Mbàjidila.”

<sup>55</sup> Wàkabàpèèsha bukolè bwa kulwisha nyuma ya bukooyà. Yivwa yipàtuka. Wàkafùnda mènà àbò mu Mukàndà wà Mwoyi wà Mwânà wa mukooko. Ne Wàkabàtùma, Yone. . .Maatàayi 10, ne kubàpèèshaYè bukolè pa nyuma ya bukooyà; bààkiipata nyuma ya bukooyà, ne bààkenza byenzedi, ne bikwabo. Ne bààkaalukila, bènda bàsànka, kwambabò ne: “Nansha démons miine’s yivwa mitùkòòkèle.”

KwambaYè ne: “Kanùsànki ne bwalu démons mminùkòòkèle nansha; kàdi sànkayì bwalu mènà ènù mmáfùnda mu Mukàndà.” Ne Yudààsè ùvwa naabò. Mònaayi mùdiye mwa kwikala museemène pabwìpi; mupicile mu dibingishiibwa, mukabwelè too ne mu dijidiibwa. Kadi wàkalejila bukénké bwèndè mwaba kaayi? Wàkadileejila mwaba kaayi? Kumpàla kwa Mpenta, s’ki kwàkaleejilàye cìvwàye.

<sup>56</sup> Tàngilàayi, nyuma awu neikalè ne kaneemu kakolè bwa ntèndeleeu anu mùdì bàdì bàdyùmvwa ne mbatàmbe bakwabo ne mwabo mwònsò abu, too ne mùdìbi bikafika ku bwa Nyuma Mwímpè, pàabò bumba bàMuumusha anu mwaba awu. Ki yèyè nyuma awu (kanwènaayikù mwa kumumòna anyi?) udi wenda ubànda, mufwilakanyi ne Kilisto awu. Ne Yesu wàkamba ne: “Yivwa mwa kwikala mifwànàngàne, mu matùkù a ndekeelu, mu mushindu wà bifwànyine kuseeswisha too ne Basungula mene bu ne bìvwa mwa kwenzeka.” Kàdi, vùlukàayi ne, anu Basungula mbààcimònà.

Nzambi ùtu ùbiikidila ku disungula. Wêwè, kwènàku ne disànka ne udi umwe wa kùdìbo anyi? Nwènù, bàdì kaaba aka dilòòlò edi aba, bu munùdì bamanyè ne cintu kampànda mu mwoyi wènù amu cidi cikòka ne: “Ndi muswe Nyuma Mwímpè

awu. Ndi muswe, Mukalenge, bwa Wikalè mu mwoyi wànyì”? Aci bwalu Nzambi mmufunde dinà dyebe mu Mukàndà wa Mwoyi wà Mwànà wa mukooko kumpàlà kwa difùkà dya dyulu ne buloba. Yèyè ngudi mwambe nanku.

“Muntu nansha umwe kèna mwa kulwa kùNdi,” mwàkambà Yesu, “pàdi Taatù Wanyì kàyi mumukòke dyàmbedi nansha. Ne yònsò udi ulwa kùNdi, Mémè némmpèeshè Mwoyi wà Cyendeleele.” Mwoyi wà Cyendeleele ncinyì? Nyuma Mwïmpè. “Mwoyi wà Cyendeleele,” angàtaayi mwakù awu nuwùlondèshè mu cyena Ngelikà, mmwambè ne, *Zoe*. *Zoe* n’Nyuma Mwïmpè. “Bònsò bàdi Taatù muMpèeshe nebàlwe kùNdi. Ne yònsò udi ulwa kùNdi, Mémè némmpèeshè Nyuma Mwïmpè, ne Némmbùishè ku lufù ku ditùkù dya ndekeelu, Mémè nèncyènze,” mwàkambàYe. Kakwèna bya ne bu-ne-ne bwa Cyôci aci to. “Némmpèeshè. Yònsò ulwàlwa awu; ne Ndi mmupèesha Mwoyi wà Cyendeleele.” Yèyè neikalè ne cya kubìika ku lufù, bwalu ùdi ne Mwoyi wà Cyendeleele. Ùdi ne cya kulwa. Yèyè kèna mwa kufwà to anu mùdi Nzambi kàyi mwa kufwà amu.

<sup>57</sup> Kaa, nwènù balundà bàànyì bananga bàà mu ditùnga dijimà emu ne mu kaacimenga kakese aka, bu ne mwakù ne mushindu, anu ne dyànyì diyì dya buntu edi, wà kunùbweja mu myoyi yenu amu mùdi kupeta kwa dibàtiiza dya Nyuma Mwïmpè ne mushinga, cìwva cìfwànyine kwikala dibuulula didi ditambe bulenga dya dikèma dyùkaadiku mupetè mu nsòmbelu webè bwa kacyapù. Pa kumòna cidi. . . Wèwè’s udi ne cya kucyènza.

Ngǎnjì ntookeshèbi cyôci aci, pa ne: “Kwèna mukùdimùne mucimà to.”

<sup>58</sup> Peetèlò’s ùkaavwa musùngidìibwe. Ùvwa mwitàbùùje Mukalenge, muMulondè. Yesu kumwambila ne yèyè ùvwa nganyì, kumwambila bwa kuMulonda. KumupèeshaYè bukòlè bwa kulwishangana ne nyuma ya bukooyà ne kumujidilaYè. Kadi paanyimà pàà byònsò abi, ne mulwè mwakudi wa mushinga mukole bwa kasùmbù aku; mùdi beena Katolike bafwànyine kuswà kucibìikila ne, “mwepiskopo wa ekeleeziya, anyì paapà,” anyì cyònsò cìwvaku aci, muntu udi kumutù kwa ekeleeziya; kadi Yesu wàkamba, bufùkù bwa diMupàngila Dyèndè abu ne: “Udi muNnangè anyì, Peetèlò?”

Ki awu ne: “Mukalenge, Wèwè’s udi mumanyè ne ndi muKunangè.”

KwambaYè ne: “Dìisha mikooko Yànyì.” KwambaYè nanku misangu yisatu.

Ki Peetèlò kwambayè ne: “Wèwè’s udi mumanyè ne ndi muKunangè, mu mushindu wà ne nènye neeBè too ne—ne ku ndekeelu, ne nènye neeBè too ne ku lufù,” ne bikwabo.

<sup>59</sup> KwambaYè ne: “Kumpàlà kwa citààlà kusàmaci misangu yisatu, newikalè. . . kumpàlà kwa citààlà kusàmaci, newikalè muMvilè misangu yisatu.” KwambaYè ne: “Kadi, Peetèlò, Ndi

mukusambidile wêwè.” Tèèlejàayi. Abi kî mbyónsò to. “Ndi mukusambidile wêwè. Nenku paanyimà pàà wêwè mukùdimùne mucimà, díbà adi wakànkamika bânà beenu.”

“Paanyimà pàà wêwè mukùdimùne mucimà.” Yèyè’s ùkaavwa mwelè mbilà. Ùkaavwa pàmwápa muje maja mu Nyuma. Yèyè, ùkaavwa mwenzè bintu bya mishindu yónsò, kadi kàvwa mwanjì kupeta Nyuma Mwímpè to. “Paanyimà pàà wêwè mukùdimùne mucimà, wakànkamika bânà beenu,” aci’s ncilelèla, “ùkumbajè ndongamu Wendè.”

<sup>60</sup> Mpindyewu ngǎnjì njikijè kubala kwa Yone 14.12. Mpindyewu mu nshapità wa 14 ku mvensà wa 12, Yesu mmwambe ne: “Bulelèlè, bulelèlè, Ndi nnwàmbila ne, ewu udi witabuujà...” Ne wêwè kwèna mwa kwitabuujà... “Ūngiitabuujà Mémè.” Udi mwa kwitabuujà *mu* Yèyè. Mbanganyi bàdi bùmvwà aci? Bámbe ne: “Amen.” [Disangisha didi dyàmba ne: “Amen.”—Muf.]

<sup>61</sup> Nudi bavùlùke, mu Byenzedi 19. Ndi ngumvwà bibì bwa kwimanyikila cyòci eci apa, kadi bikèngela anu ncyámbe mùdici cimvwila emu. Mu Byenzedi nshapità wa 19, pàvwa muyiishi wa ba-Baptistes ewu, mwine uvwa mwa—mwakwidyanganyi kadi uvwa mukùdimùne mucimà ewu, ne yèyè ùvwa ùyiisha ùfikisha bantu ku disùngidiibwa. Nenku bàvwa ne disànka dinene, biikàle anu bàcyònkomoka ne bèèla mbilà, munkaci mwa kwenza disangisha. Byenzedi 18, Akulà ne Piisikilà, tuvwa bacitèèle makèèlèlè dilòlò awu, nenku bàvwa bayè kamumòna. Ne bôbò bàvwa bamanyè ne ùvwa muntu munene, ne ùvwa mulongi. Ne ùvwa ùjaadikilangana ku Bible ne Yesu ùvwa Mwànà wa Nzambi, cibì mumanyè anu dibàtiiza dya Yone nkààyaadi. Kàvwa mwanjì kumanya dibàtiiza dya Nyuma Mwímpè to. Pa nanku kwambayè . . .

Akulà ne Piisikilà, mulùme awu ne mukàjèndè, benji bàà ntentà abu; byôbi biine, ne Pòlò pèndè, ùvwa mwenji wa ntentà. Ne bôbò abu bààkapeta Nyuma Mwímpè ku dilongesha dya Pòlò. Kwambabò ne: “Tudi ne mwanèètù wa balùme mukese wíkala mwa kulwa kaaba aka. Ùlekelè yèyè àkulèku neetu ndambu pa bwalu abu.”

Nenku pàakalwà Pòlò ne kuumvwayè ùyiisha, wàkamanya ne ùvwa muntu munene, kwambayè ne: “Nukààdikù bapetè Nyuma Mwímpè kacya nwítabuujà anyi?”

Bôbò ne: “Katùtu bamanyè ne kùdikù . . . bwa ne kùtukù Nyuma Mwímpè to.”

Yèyè ne: “Kadi nku cinyi,” anyi mwakù mulelèlè wà cyena Ngelikà wùdiku, “nwàkabàtijiibwa mushindu kaayi?”

Bôbò ne: “Twètù tukàadi bamanè kubàtijiibwa kùdi Yone Mubàtiji.”

<sup>62</sup> Mpindyewu tàngilààyaaku cyàkamba Pòlò. Pòlò wàkamba, ne: “Bulelèlà Yone wàkabàtiiza bwa kanyinganyinga; kÌ mbwà dilekelediibwa dya mpekaatu to, kadi bwa kanyinganyinga, wàmba ne, kÌ cinùdi biitàbùùje.”

Paùdi witabuuja Kilisto bu Musùngidi webè sungasunga, udi witabuuja *mutàngile ku* dibàtiiza dya Nyuma Mwïmpè. Aci kÌ ndibàtiiza dya Nyuma Mwïmpè to, nwènù bânà beetu bananga ba-Baptistes. Ncya mafi.

Mwanèètù kampànda ùvwa ùngambila ditùkù adi, ne: “Mwanèètù Branham,” anyi kùkaadi cikondo kampànda, kùkaadi ngondo ndambu, kwambayè ne: “Mwanèètù Branham, Abraham’s wàkiitabuuja Nzambi, ne kubadiibwaci kùdiye bu bwakàne.”

Mêmè kwamba ne: “Cya bushuwa.”

Yèyè ne: “Ncinyi cikwabo cidi muntu mwa kwenza pa kuumusha kwitabuuja?”

<sup>63</sup> Mêmè ne: “Aci kÌ cyònsò cidi muntu mwa kwenza. KÌ cyònsò cidiye mwa kwenza leelu ewu, nkwitabuuja Nzambi. Kadi Nzambi’s wàkamupèèsha citampì cya ditengudiibwa.” ditwàlongù makèlèlèlè dilòòlò awu adi, “bu cimanyinu cya ne Yèyè wàkiitaba diitabuuja dyèndè mu Yèyè.” Nenku, leelu ewu, too ne pùikalà Nzambi. . .

Wèwè udi witabuuja mu Yèyè paùdi uMwitaba bu Musùngidi webè sungasunga apu. Kadi pàdi Nzambi ùkupèèsha citampì cya Nyuma Mwïmpè, Yèyè wàkutù citampì too ne kwebe kwa Cyendelele kuwàyà. Mpindyewu nwènù ba-Baptistes angàtaayi aci, nenku nènye neenù pa dikùbiibwa dya Cyendelele adi. Eyowa’s, mukalenge. Bwalu: “Kanùbungamiji Nyuma Mwïmpè wa Nzambi to, unùdi batwibwe Nendè citampì too ne ku ditùkù dya bupikudi bwenu.” Kwèna mutwibwe citampì pa kwitabuuja *batàngile ku* to, kadi udi mutwibwe citampì kùdi Nyuma Mwïmpè. Efèsò 4.30: “Kanùbungamiji Nyuma Mwïmpè wa Nzambi to, unùdi batwibwe Nendè citampì too ne ku ditùkù dya bupikudi bwenu.” KÌ Cidi cikutwà citampì, paùdi ulengeleela Nzambi, ne Yèyè mukutwè citampì ne Nyuma Mwïmpè.

KÌ mùdibi nanku, bwalu Bible mmwambe ne: “Muntu nansha umwe kèna mwa kubùikila Yesu ne n’Kilisto to, anu ku Nyuma Mwïmpè.”

<sup>64</sup> Wèwè udi wamba ne: “Ndi ncìitabuuja bwalu mmùdi mpaasàtà mwambe.” Yèyè mmubingè, kadi aci kaciyèna cibadiibwa bwebe wèwè nansha. “Ndi ncìitabuuja bwalu mmùdi Diyì dyàmba.” Aci mmwòmò, kadi aci kÌ ncyèbe wèwè to, aci kaciyèna cibadiibwa bwebe wèwè nansha.

Mushindu wùmwèpelè wùdi mwa kwamba ne Yesu n’Kilisto, mpàdi Nyuma Mwïmpè ùbwela munda mwebe ne ùfila bujaadiki, ne ùjaadika Yèyè mwine ne: “Yèyè m’Mwànà wa

Nzambi.” Ki mushindu wùmwèpelè wûdi umanya dibùikà dya ku lufù, mpàdi Nyuma Mwímpè ùfla bujaadiki. “Piikalè Yèyè Nyuma Mwímpè mulwe, Yèyè neàmfidilè Mémè bujaadiki, neànùleejè maalu àcìvwavwà; maalu aa, àngãmbi Mémè aa, neànùvùlwijewu.” Kwàkucipetakù mu kàlaasà to. Nwamònu anyi? Yèyè neànùvùlwijè maalu aa.

<sup>65</sup> Mpindyewu tudi baswe kubala Mufùndù ewu too ne kwìnshì ndambu mpindyewu, Yone Munsantu 14.12.

*Bulelèlà, bulelèlà, ndi nnwàmabila ne: Ewu udi ungiitabuujà mémè, byenzedi bìndi mémè ngenza yèyè neabyènzè pèndè; ne bitàmbe bunene. . .*

Bidi ne, nkùdimwinu mujaalàme mwaba awu ùdi “bitàmbe bùngi,” nwènù baswe kucikèba.

*. . .byenzedi bitàmbe bunene kùdi byòbi ebi mbyènzàye, bwalu mémè ndi nya ku Taatù.*

<sup>66</sup> Bu Yèyè mwa kuya ku Taatù, mpàvwà Nyuma Mwímpè mwa kulwa. Mmwómò anyi? Mukwabo Mufùndù mmwambe ne: “Mémè ncìyi muyè to, Musàmbi kààkulwa to. Kadi Mémè muyè, Nèngààlukilè cyàkàbìdi ngiikalè neenù, munda mwenu mene.” Nwamònu’s, n’Nzambi neenù. Kumutù kwenu, kumpàla; neenù, mu Kilisto; munda mwenu, mu Nyuma Mwímpè. N’Nzambi munda mwenu.

<sup>67</sup> Mpindyewu: “Byenzedi bìndi Mémè ngenza nenùbyènzè pèènú,” kacìyi cyenzedi cikwabo to. Kadi Nzambi mmuswe kutwàla Nyuma Mwímpè, munda mwebe, bwa kutùngunuka ne mudimu wumwewumwe wùvwàYe wènza munda mwa Kilisto awu.

Mudimu awu kawùvwa menemene wùkèngediibwa mu matùkù a Luther to. Cìvwa ng’Ekeleeziya wa Nzambi. Kawùvwa. . .Wàkatàmbe kukèngediibwa kakese mu matùkù a Wesley.

Bwalu: “Bàà pa buloba,” mùdi Bible mwambè, “bàvwa mwa kutàmbe kulwa ne butekète, ne lungenyi, ne lwonji lutàmbe dîbà dyònsò.” Tudi. . .Bàà pa buloba bàdi bàtàmbe kulwa ne lwonji dîbà dyònsò. . .Aci tudi bamanyè. Mòna’s, bantu bàdi bènza bintu leelu mu mushindu wà ne, kùkaadi bidimu lukàmà kùvwà kùyikù mwa kwikala mwele meeji ne kùvwà kufwànyine kwikala muntu wetù ewu ne cikisu cya mushindu awu to. “Bàtàmbe kwikala ne lwonji dîbà dyònsò, ne beena lwonji nebàtàmbe kwenza maalu ne lwonji, dîbà dyònsò,” mùdi Mufùndù mwambè, “lùvulangana anu kuvulangana.”

<sup>68</sup> Pa nanku, Nyuma Mwímpè mmukwàtèkwàte mudimu. Kùvwa anu kaamweyelu kakese kàà Yèyè awu ne Luther; kaamupùùyà kakese kàà Yèyè awu ne Wesley; ne mupùùyà wà mu ndòndò wà Yèyè awu ne Mpenta; mpindyewu mupùùyà awu ne Nyuma mbilwe cintu cimwe. Ùdi munkacì mwa

kudisanga, ùpàtula mupùùyà wumwewumwe wà bukolè wà Nyuma Mwímpè awu mwàkenzàYe kale wàwa amu, ùmwènesha byenzedi bimwebimwe byàkenzàYe kale wàwa, bìdi munkaci mwa kumwèneshiibwa leelu ewu mene ebi, cintu cimwecimwe aci.

<sup>69</sup> Tàngilàayi cyàkambà Yesu: “Bulelèlà, bulelèlà Ndi nnwàmbila ne, Mwànà kèna mwa kwenza cintu nansha cimwe to anu Yèyè ùmòna Taatù ùcyènza dyàmbedi. Cìdi Taatù wènza aci, Ùdi ùcileeya Mwànà. Taatù mmusòmbèle munda Mwànyì; Yèyè ngudi wenza byenzedi.” Nwamònu anyì?

<sup>70</sup> Mpindyewu mònaayi, cikwabo cintu ncyòci eci cìndi njinga kwamba kaaba aka mene. “Mùdi,” mwàkambà Yesu, “mùdi Taatù muNtùme. Mùdi,” mpindyewu tàngilàayi, “mùdi Taatù muNtùme, ki mùNdi pàànyì nnùtùma.” “Mùdi Taatù. . .” Taatù wàkaMutùma bìshi? Taatù, wàkaMutùma awu, wàkatùùluka mu Dyulu e kusòmbelaYè munda Mwèndè.

KutùngunukaYè. KwambaYè ne: “Ndi ngenza misangu yònsò anu cìdi cisànkishà Taatù Wanyì.” Nwamònu anyì? Wàkaya wènda wènza bintu bivwà Taatù ùMuleeya bwa kwenza. “Ncyèna ngenza cintu nansha cimwe to anu cìdi Taatù Wanyì ùNdeeja dyàmbedi.” Nzambi uvwa muMutùme awu, ùvwa munda Mwèndè. “Nenku mùdi Taatù muNtùme amu, mushindu wumwewumwe wùdi Taatù muNtùme awu, ki mùNdi nnùtùma pàànyì.” Ncinyì aci? Nzambi munda mwebe, ùtùngunuka ne (cinyì) byenzedi bimwebimwe abi, bimwebimwe abi.

Yesu wàkamba ne: “Kùdi. . .ewu udi *witabuuja*, ewu udi naaNyì munda mwèndè awu, Nyuma Mwímpè; ewu udi *witabuuja*, ukàadi mumanè kufila bujaadiki bwa dibikà Dyànyì dya ku lufù, mumanyè ne Mémè ndi munda mwèndè awu. Ewu udi munda Mwànyì awu; nwènù bashààle munda Mwànyì, Méyì Àànyì mashààle munda mwenu.”

<sup>71</sup> Mpindyewu wèwè udi wamba ne: “Mémè ndi musòmbèle munda mwa Yesu; kadi ncyà bushuwa ne ncyèna ngiitabuuja dyondopa dya kùdi Nzambi to.” Aci’s cìdi cileeya ne Yèyè kènamù.

<sup>72</sup> “Ndi mwitabùùje mu Yesu; ncyèna ngiitabuuja mu Nyuma Mwímpè mu ditùkù edi nansha, kî mmwàkaMupetàbo kale wàwa to.” Aci’s cìdi cileeya ne Yèyè kènamù.

<sup>73</sup> Nyuma Mwímpè neàfilè bujaadiki bwa Dìyì dyònsò dyàkambàYe. Yèyè kî mmwena mashimi nansha. Kèna ùciina muntu nansha umwe anyì bulongolodi nansha bumwe to. Kabyèna bikèngela bwa kutwìlaYè muntu nansha umwe binù to. Yèyè ùdi wàkula, ne pashìshe Ùdi ùshààla naaci.

Beena myânzù mitùmbùke, ne bakooyike, ne bàdi balongè tùlaasà, anyì mutùdi mwa kucibùkila ne, bàdi bàkòokeshà bwa mabanji àdìbo naawù, bòbò kabàyi baswe kuMupeta to, “Nzambi ùdi ne bukolè bwa ku mabwe aa kujuuu dila

Abraham bânà.” Yèyè neàngatè baakánkè, ne basùmbishi bàà mu musokoko bàà maalà a kapyà, ne bikwabo byònsò, ne neàbijuulè. Nzambi ùdi mwa kucyènza, ne ki kucyènzaYe eku. “Nzambi ùdi ne bukolè bwa ku mabwe aa kujuudila Abraham bânà.” Muntu kampànda neàcyènzè, bwalu Yèyè ùdi Nzambi.

<sup>74</sup> “Nwènù bashààle munda Mwànyì, ne Mèyi Àànyì munda mwenu, nùlombè cinùdi baswè,” bwalu nudi nulòmba Dìyì Dyèndè, ne Dìyì Dyèndè didi Mwoyi. Úcyàmbè. Pìikalàbi ne Nzambi mmucyàmbè, ne wèwè mutwishùbwe ne Yèyè mmucyàmbè, Nyuma Mwímpè ùdi ùfila bujaadiki ne Dìyì ndilelèlè, díbà adi, ki bwalu mbwòbù abu’s, mwanèètù. Úcyàmbè; ki cyòci aci. “Ambilà mukùnà ewu ne: ‘Tentèmùkà,’ kùyi wela mpatà munda mwa mwoyi wèbè to, kadi witabuujà ne ciwàmbì aci necyènzekè.” Udi wakula awu kî ngwèwè to, kadi n’Taàtù udi musòmbèle muda mwebe; Yèyè ngudi wakula. Kî ngwèwè udi wakula ne mukùnà awu to, n’Taàtù udi munda mwebe, wàkula ne mukùnà awu. Wùdi ne cya kutentemuka. “Maulu ònsò ne buloba nebijiminè,” mwàkambàYe, “kadi Nyuma Wanyì to, anyì, Dìyì Dyànyì kadyàkujiminakù to.” Cya bushuwa, kaDyèna mwa kujiminakù to. Taatù!

<sup>75</sup> Mpindyewu: “Byenzedi bìndì Mèmè ngenza.” Nzambi ùdi munda mwa Ekeleeziya Wendè, bwa kutùngunuka ne midimu Yèndè. Ki cyàkatùminàYe Nyuma Mwímpè. Mpindyewu, Yèyè ùvwa mumanye cyòci aci. Yèyè, Ùvwa mumanyè ne kacìvwa cifwànyine kwikala to, kacìvwa mwa kwenzeka mushindu awu to, pa nanku nansha bya munyi, pa nanku bivwa bikèngela anu Àtumè. Taatù wàkatùma Mwànà, wàkatèèka cyònsò ciwà mu bukòk- . . . Mwànà munda mwebe. Nenku byenzedi bimwebimwe byàkenzàYe abi, byenzedi anu byòbi bimwebimwe byàkenzà Yesu abi, nwènù nenùbyènzè pèènu, Ekeleeziya.

Nwènù kanwènakù baswe kwenza byenzedi bya Nzambi anyi? Yesu mmwambè ne: “Nwènù baswè kwenza byenzedi bya Nzambi, ngiitabùùjaayi Mèmè.” Udi uMwitabuujà bishi? Kwèna mwa kucyènza paùdi kùyi mupetè Nyuma Mwímpè to.

<sup>76</sup> Bwalu, muntu nansha umwe kèna mwa kwamba ne Yèyè m’Mwànà wa Nzambi to; wèwè udi wamba cidì kampànda mukwabo mwambè. “Bible mmwambè ne Yèyè ùdi Mwànà wa Nzambi; mèmè ndi ngiitabuujà Bible.” Eyo. “Bible mmwambè ne Yèyè ùdi Mwànà wa Nzambi; mèmè ndi ngiitabuujà Bible. Mpaasàtà mmwambè ne Yèyè ùdi Mwànà wa Nzambi; mèmè ndi ngiitabuujà mpaasàtà. Maman mmwambè ne Yèyè ùdi Mwànà wa Nzambi; mèmè ndi ngiitabuujà maman. Mulunda wanyì mmwambè ne Yèyè ùdi Mwànà wa Nzambi; mèmè ndi ngiitabuujà mulunda wanyì.”

Kadi mushindu wùmwèpelè wùndiku mèmè mwa kwamba ne Yèyè ùdi Mwànà wa Nzambi, mpàdi Nyuma Mwímpè ùbwela ne ùfila bujaadiki bwa Yèyè mwine, díbà adi ndi mmanya ne



Yèyè ùdi Mwànà wa Nzambi. “Muntu nansha umwe kèna mwa kubìikila Yesu ne ‘n’Kilisto’ to, anu ku Nyuma Mwímpè.” Ki bwalu abu’s!

<sup>77</sup> Muntu nansha umwe wàkwila ku Nyuma wa Nzambi kàtukù mubiikile Yesu ne mmwediibwe mulawu, anyì wàmba ne Yèyè ùvwa cintu kampànda mu ditùkù adi ne cingà cintu leelu ewu to. Aci’s cidi ciMuvwija ne butekète ne wa kàyi kukwàcila kaaba kàmwè. To, mukalenge.

Yèyè ùdi umwèumwè awu makèèlèlè, leelu, too ne kashidi. Nyuma kanà yònsò wa bulelèlè neàfilè bujaadiki abu. Eyo.

<sup>78</sup> Mpindyewu, Yèyè wàkamba ne: “Byenzedi bìndì Mémè ngenza ebi nenùbyènzè pèènù,” Yone 14.12, mpindyewu, byenzedi bimwebimwe abi.

“Kaa,” mùdìbo bàmba, “ekeleeziya’s ùdi wènza cyenzedi cya citàmbe bunene leelu ewu.” Mu mushindu kaayi?

Yèyè nyawu mwambè ne: “Byenzedi bìndì Mémè ngenza.”

“Abi,” mùdìbo bàmba, “ee, s’tudi ne ba-missionnaires pa buloba bujimà, s’ki cyenzedi cya citàmbe bunene aci.”

<sup>79</sup> Kadi Yèyè wàkamba ne: “Byenzedi bìndì Mémè ngenza.” Mpindyewu byènzààyaaku’s, anjààyi kubyènza, pashìishe nwàkulè bwa ba-missionnaires.

<sup>80</sup> Leelu ewu, kùkaadi cikondo kampànda mvwa ngaakula bwa Mùzùlumanyi kampànda, yèyè kwamba ne: “Mahomet awu’s mmufwe.”

“Aci neya bushuwa ne, yèyè ùdi mu lukità, kadi dīngà ditùkù neàbiikè ku lufù.” Yèyè ne: “Yèyè mujuukè mu lukità, buloba bujimà nebàcimanyè munda mwa mèbà makumi abidi ne anaayi.” Yèyè ne: “Nwènù aba’s nutu nwamba ne Yesu mmubiike ku lufù kùkaadi bidimu binunu bibidi, kadi nansha cyàbisatù cimwè cya bantu kī mbanji kumanya bwalu abu to.”

S’mbwalu nudi bacyàmbile ku mmwènenu wa mamanya a mu mitù. Nudi baakùle biimànyine pa mmwènenu wa tùlaasà anyì wa dilonga dya tùlaasà.

Ekeleeziya mujimà, munene wa Nzambi ewu, tubadilakù ne Katolike, Mishònyì, bònsò basanga ntete, bu ne bàtu bapeté Nyuma Mwímpè, buloba ebu’s nùнку mbushààle bushindàme mu bwena Kilisto; nùнку kī nkufwànyìnekù kwikala cintu pààci ne n’communisme to; nùнку kī nkufwànyìnekù kwikala cintu pààci ne mmvità, anyì lukunà, anyì lwonji, anyì lukìnu to. Nùнку’s Yesu mmusòmbe pa Nkwasa Wendè wa butùmbi, ne twètù twenda twendakana eku ne eku mu mpàlàdiizò wa Nzambi, biikàle ne Mwoyi wà Cyendeleele, biikàle ne mwoyi kashidi; bamanè kubìishiibwa ku lufù mu mubidi mupyamùpyà, twenda twendakana, katùyìkù mwa kukùlakaja, katùyìkù mwa kutòloka mvya, katùyìkù mwa kusaama, katùyìkù mwa kuumvwa nzala to; twenda twendakana mu masànkà a

Mukalenge, tuyiikila ne nyama. Nenku, kaa, ditùkù kaayìpu's wè! Kadi tudi benzè byònsò pa kuumusha civwàYe. . .

<sup>81</sup> Yèyè wàkamba ne: “Ndàayi pa buloba bujimà nùkayiishè Evanjeeliyo.” Evanjeeliyo ùdi wènta cinyi? “Kí ng'anu mu Diyì nkàayaadi to, kadi mu Bukolè ne dileeja dya patòoke dya Nyuma Mwímpè.” Kumwènesha Dìyì dya Nzambi, ki Evanjeeliyo nyèyè awu.

<sup>82</sup> Kwèna mwa kucyènza to. Mpindyewu, Yesu ùvwa mumanyè aci ne, bìvwa bikèngela kwikalaYè ne mwoyi munda mwa Ekeleeziya Wendè.

Pa nanku, Yèyè ùvwa mumanyè ne netwikalè ne bilongelu bya mamanya a mu mitù. Kadi kanwàkupetakù Cyôci eci mu cilongelu cya mamanya a mu mutù to. Bôbò nebàbènganganè naaCi. Bwalu, cyònsò cidìbo bôbò bamanyè cidi anu diyiila dya kùdì muntu kampànda wa meeji matwè, twitabàayi anyi dngumba kampànda bidìbo baswè kwi—kwikala ne mwoyi ku byôbi. Pa nanku, bôbò—bôbò nebàkushikikè mu cyôci aci ne kukuwija cidimba cya mubidi awu, nenku, mwanèètù, bàkutèèlela tùmwe tuubintu twà mu twitabàayi kampànda bidì bifwànyine kumwènèka anu bu ne mbipwàngàne. “Ekeleeziya munsantu munene, maamù, mmukàndàmèène bisuusù byàbùngi, mmukàndàmèène mikùmù yàbùngi.” Nansha dyabùlù pèndè's; yèyè's mbamwipàtùipàte myaba yònsò yidìku ayi, pàmwe ne yònsò, kadi mmutùngùnùke wènda ùya anu mwèndè ne kale. Eyowa's, mukalenge. Kaa, nebàteete kutèèla byôbi ebi.

<sup>83</sup> Pa nanku Yesu ùvwa mumanyè ne kùvwa mwa kwikala nkwaka munene wa mamanya a mu mitù anu mwàkadiyi mu matùkù Èndè amu, kubwela mu disukula dya ngeesu ne mpanù, ne divwàlà dya bilàmbà, ne nshingu ya nkoolò, ne byònsò mùvwàbo bàbyènza amu, bintu byònsò bishiièlèshiièlàngàne ebi bìvwàbo mwa kwenza. Ùvwa mumanyè ne bàvwa mwa kwenza nanku, pa nanku kwambaYè ne: “Mpindyewu anjì indilaayi kakese. Ncyàkunùshiya kanùyì busàmbi to, Nèngààlukilè cyàkàbìdì bwa kwikala neenù. Ki bwa cinyi,” mwakambàYe, “byenzi bìnì Mèmè ngenza, nenùbyènzè pèènù.”

<sup>84</sup> Kiiipàcilà kàà ditùmà dya Nyuma Mwímpè kàvwa mbwà Nzambi kutùngunukilaYè mu musùmbà wà bantu, bwa kumwènesha Nzambi dibà cyònsò kùdì bàà pa buloba. Aci mmùdici menemene. Kakùyì ku twitabàayi, kakùyì ku dingumba to, kadi ku Bukolè bwa dibiiikà Dyèndè dya ku lufù, ku divwija dya Dìyì Dyèndè dilelèlè; ku dyangata dya mulayi Wendè, ne ku diimanyina ku luseke lwà banyaàbanyà, ne mu kwitabuuja kwa Nzambi; nenku mònayì maulu mafiike mùdìwu ààlukila cyànyimà, ne Bukolè bwa Nzambi bùbwelamù bwàngata bukòokeshi. Amen. Ki cidìYe muswe. Ki cidì Nyuma Mwímpè mutùmìna ncyôci aci. Ki cyàkaMutùmìnàYe. Twàmanyi mpindyewu cidìYe, ne ki cyàkaMutùmìnàYe ncyôci aci.

<sup>85</sup> Ki bwa cinyì, mashi makwabo nansha àmwè kaàvwa mafwànyine kujidila bantu to. Mémè ncivwa mwa kukujidila wèwè to, ne wèwè kùvwa mwa kunjidila mémè to, bwalu tudi bônso balediibwe ku disangila dya mulùme ne mukàjì. Kadi Yesu wàkalediibwa kakùyì disangila dya mulùme ne mukàjì to, ncyà bushuwa, pa nanku Èndè Mashi ngàvwà majididi. Nenku Nzambi wàkapweka, wàkenza mubidi, wàkasòmbelamù, wàkeela Mashi awu panshi bwa kujidila ewu nùnkù, kakùyì mpatà to ki cyàkiipatà dipiilà dya ku mpekaatu ne bundù. Dìbà adi, ku diitabuuja, ku diitabuuja dya Cyôci aci, Nzambi ùdi ùpweka buludi mu mubidi wà buntu awu, ku dijidila dya ku Mashi awu, ùmuvwijà Dimiinu dya Abraham, ku diitabuuja.

<sup>86</sup> Bwa kwitabuuja ne Mashi awu àvwa àlwa, Mashi makezùke awu àvwa mwa kwikala cishimà byenzè bu mashi èndè yéyè, yéyè wàkenda mwaba awu paanyimà pàà “mumanè kwikala anu bu mufwè wa menemene ewu.” Wàkiitabuuja Nzambi munda mwa bidimu makumi abidi ne bitaanu, mwikàle ne bidimu makumi mwandamutekètè ne bitaanu, ne wàkiitabuuja too ne pàakapètaye bidimu lukàmà. Ne Sarah, bidimu makumi asambombo ne bitaanu, ne wàkiitabuuja too ne pàakapètaye bidimu makumi citeema. “Ne mulùme mwikàle anu bu mufwe menemene.”

Nenku Nzambi kwamba Yè ne: “Bwa kaciikadi cyàlwa kupita bantu to, ndà nendè pa kakùnà aka ùmulàmbùlè bu mulàmbù wà mashi.”

<sup>87</sup> Kwambilayè basadidi ne: “Imànaayi mwaba ewu ne kampundu nwindilè. Mwanàanyi wa balùme ne mémè netùye kwàka bwa kakuukwila, ne mwanàanyi wa balùme ne mémè netwàlukilè.” Kaa, neàcyènzè bìshi’s?

Abraham kwambayè ne: “Ndi mumupètè bu udi mufùmìne ku bafwè. Nenku ndi mumanyè ne Yéyè uvwa mumumpèeshe, bu udi mufùmìne ku bafwè awu, ùdi ne bukolè bwa kumujuula ku bafwè bu mémè anu mwa kushààla mulamè Dîyi Dyèndè. Kulama, mémè ndi ndama Dîyi Dyèndè; Yéyè ùdi ne bukolè bwa kumujuula ku bafwè.”

<sup>88</sup> Wàkula anu menemene bwa Kilisto! S’n’Yéyè awu. Nenku ku kabùlù kàà Mashi aku kulwakù Nyuma Mwimpè, uvwa muDikùte mu mubidi wàkabiikidiibwà ne n’Yesu awu. Mashi awu àkajidila njila kampànda, ku diitabuuja, bwa kubiikila bapikula, anyi Basungula bàà Nzambi. Nenku paùdi umana kwitaba Aci, ne Nyuma Mwimpè muumùshe lwonji lwônso munda mwebe, Yéyè ùdi ùbwela buludi, Nzambi Yéyè mwine, bwa kwenza diswa Dyèndè.

<sup>89</sup> Pànu panshi, mfùmwebè wa mudimu wa lwonji awu ùdi ne cilunji cibi; ne *kampànda* mukwabo wa kale ewu ùdi wenza *cikampànda*; ne mulùmýàna wa kale udi wakula bwa Cyôci aci

*ewu*, ùbèngangana naaCì. Muntu mùle tètè ne Nyuma Mwîmpè neïmanè anu mumpàlà mwàcì mene. Amen.

<sup>90</sup> “Ne bààkatèya ntèmà. Bàvwa bapangi ne kabàyi balongè mukàndà to, kadi bààkatèya ntèmà kumanya ne bàvwa ne Yesu.” Ki cyàkavwilà Nyuma Mwîmpè ncyòci aci.

<sup>91</sup> Mulobi mukese wa kale kàvwa mwa kufùnda dînà dyèndè to. Kadi wàkiimana mwaba awu e kwambayè ne: “Netwitabuujè nganyi, muntu anyi Nzambi?” Amen. “Bimanyiibwè kunùdi ne, twètù netùtungunukè anu ne kuyiisha mu Dînà dya Yesu.” Ekelekele, bukìtù kaayi! Ùvwa mumanyè ne ù—ùvwa ne Nzùbu muulu mwàmwa. Ncyà bushuwa. Yèyè ùvwa mwena lwendu ne mwenyi pànwapa. Ùvwa wènda ùkèba Cimenga cicilwalwà.

Mwakwidi mwena lubombo awu ùvwa ne mushinga kaayi bwèndè yèyè? Yèyè ùvwa mwinshì mwa bukòokeshi bwa Nzambi wa mu Dyulu, uvwa mujuulè Mwan’Endè ku lufù, Kilisto Yesu, ne mumuujè ne Nyuma wa Nzambi wàkafùka mauulu ne buloba awu. S’ki bwalu mbwòbù abu. Kàvwa nendè bwòwà to. To, mukalenge. Lufù. . .

<sup>92</sup> Mòna’s, pààkapàtukàbo ne ka-Stèfanò aku muntwamu, ne kwambabò ne: “Umùsha dîyi adi!”

Yèyè ne: “Nwènù beena nshìngù mitàndàbàle aba, ne kabàyi batengula mu myoyi ne mu macì, nudì misangu yònsò anu nukàndameena Nyuma Mwîmpè. Mwàkenzà baatatwènù, ki munùdi nwenza pèènù.”

Bòbo ne: “Netùkututuutè ne mùdi ufwà!”

Yèyè ne: “Kanwèna bafwànyine kwenza nanku to nansha bishi. . .”

“Kadi netùkuleejè ní tudi mwa kucyènza anyi katwèna mwa kucyènza!” Ki kwangulabò mabwe manene ne kubangabò kumunàngulawù ku mutù.

<sup>93</sup> Kubàndulukayè, kwambayè ne: “Ndi mmòna Maulu munzùlùke. Ndi mmòna cibàndilu cyènda cipweka. Ndi mmòna Yesu mwimàne ku dyàbalùmè dya Mutàmbe Bunene.” Ne Bible kí mmwambè ne yèyè wàkafwà nansha; wàkaya mu tulù. Kaa, ekelekele! Mémè ndi anu mwa kumòna Mwanjelo ùpweka, ùmwambula ne ùmusèkenkeja bu mwànà wa mu dibòkò, maamù’s, too ne mwàkayàye mu tulù. Kaa, ekelekele! Bushuwa.

<sup>94</sup> Ki kiipàcìlà kàà Nyuma Mwîmpè nkòkò aku. Ki cyàkatùminà Nzambi Nyuma Mwîmpè ncyòci aci. Nyuma Mwîmpè mmulwè bwa kukupèèsha Bukolè. Ndi ne mikwabo Mifùndu kaaba aka, katanci kakese cyanàànà. Nyuma Mwîmpè mmulwè bwa kukupèèsha Bukolè. Ncyè—ncyèna. . . Nudi mwa kupeta ebi; ndi mutàmbe kuya kule be, dilòlò edi.

Kukupèèsha Bukolè, Bukolè mu disambila!

<sup>95</sup> Angàtâ muntu utu ne nsòmbelu mwîmpè, kadi mwikàle misangu yònsò anu mucimùnyiiibwe. “Kaa, ndi nkwambila . . .” Muntu mwîmpè: “Kaa, bushuwa’s, mêmè’s ndi munangè Mukalenge, Mwanèètù Branham.” Misangu yònsò anu mucimùnyiiibwe, kâyi ùpetakù dyandamuna ku disambila.

Uujàku anu kakàjàànà aku musangu wumwe ne Nyuma Mwîmpè, kadi tàngilà ùmonè cidi cyènzekà. Pàdiye ùya kumpalà kwa Nzambi, kèna ùcimunyiibwakù to. Ùdi ùlwa ne bukitù bwònsò ku Nkwasa wa butùmbi wa Nzambi, mwitàbùùje. Ùdi ne bukenji bwalu mmwànà wa bakàji wa Nzambi, ku Dilediibwa.

Angàtâ kalùmyànà kàka, kadi katàmbe kutulumuka aku, mfùmwendè wa mudimu ùmutwà misèbà mu mwaba wònsò awu. Wàmba ne: “Anji indilâ kakese mwab’ewu mpindyewu.” Cintu kampàndà ncishintùlùke, nwamònu’s, mmupetè Nyuma Mwîmpè. Ùdi ùkupèèsha Bukolè. Nsòmbelu webè mmùle tètè ne Bukolè.

Ùdi ùkupèèsha Bukolè mu dyakula.

<sup>96</sup> Mòna’s, ekelekele, bantu bàvwa bàcìina abu, biimàne mwaba awu; Peetèlò, Yakòbò, Yone, Luukà, ne bakwabo bònsò abu. Bàkaavwa babwelè mu cibambalu cya kuulu, bàmba ne: “Kaa, katùcyèna kabidi ne cya kwamba to. Bàba, tàngilààyi kwàka, s’n’Docteur *Kampàndà* wàwa ne kansanga mwaba wàwa. S’n’Laabi *Kampàndà* wàwa ne kansanga. Nudi bamanyè’s, yèyè mmupetè mapòlomè anaayi a ku cilongelu citùmbùke; mmunyi mutwàkùngamanganàku nendè’s?” Peetèlò kwambayè ne: “Kaa, mêmè’s ndi mvùluka ne ngâkasùmbisha muntu wàwa mishipa dîngà ditùkù. Yèyè, wàkula anyi, ncyàkamanya nansha ciine civwàye wàmba aci to. Kaa, ncivwakù mfuwànyine kukùngamangana nendè to.” Kadi ncinyi. . .

“Tudi mwa kwenza cinyi, bàna beetu?”

“Yèyè mmwambe ne: ‘Nwìndilààyi.’”

“Ee, s’nyewu tukàadi mwab’ewu matùkù anaayi.”

“Tùtungunukè anu ne kwindila.”

“Too ne dîbà kaayi?”

“Too ne.”

“Ee, Yèyè mmwambe ne necyènzekè mu ditùkù diitànù anyi?”

“Yèyè kî mmwambe ne too ne dîbà kampànda to. Yèyè mmwambe ne: ‘Too ne.’”

Ee, bààkatùngunuka anu ne kwindila. Too ne dîbà kaayi? “Too ne.” Matùkù mwandamukùlù kupitàwù. “Too ne.” Matùkù citeama kupitàwù. “Too ne.”

*Ki ndekeelu wa byònsò pààkalwà ditùkù dya Mpenta kukùmbana, bàvwa bònsò mu mwaba wumwe, ne dîyi dimwe.*

97 Nzambi ùkaavwa mumanè kwikala kumutù kwabo, mu Ditutu dya kapyà; Nzambi ùkaavwa mwendè naabo, pa buloba; mpindyewu cintu kampànda cikwabo civwa ne cya kwenzeka. Cintu kampànda cikaadi pabwìpi ne kwenzeka.

...bàvwa bònsò mu mwaba wumwe, ne dīyī dimwe.

*Ki dyākāmwe kulwakù cyonà cìfùmina mu dyulu bu...cipeepèlè cicolè cya civuma, ne cyakuuja cibambalu cijimà civwàbo basòmbèle.*

...ndìmi mipandùlùke...yàkasòmba pamutù... pààbò.

*Mipandùlùke* ncinyi? “Myabùlùke.” Byenzè bu bàdì bàkukumina, kacya nukààdikù bumvwè muntu ùkukumina anyi? Ûdi wènta ne, “uh-uh-uh, kaa, uh-uh,” nwamònu’s, kàyi mwa kwamba cintu ciine to. “Mipandùlùke, myabùlùke.” Byenzè mùdì cikòndò *cipandùlùke* amu, cyùmvwija cintu kampànda ciikàle “citàpùlùke, cyabùlùke.” Kabàvwa bàyiikila to. Kabàvwa bàkukumina to. Kabàvwa bènza cintu nansha cimwe to kadi bènza anu mutooyi cyanààna.

...ndìmi mipandùlùke yàkasòmba pamutù pààbò, byenzè bu ne nkapyà. (Kaa, kabàvwa mwa kudikànda tò!)

*Ne bààkuujiibwa bònsò tètè ne Nyuma Mwìmpè, ... (Yoyoyò!)*

98 Pashìshe cyàkenzekà ncinyi? Bàkapàtuka e kubwela mu mìsèèsù. “Laabì Jones awu wèpi? Mulúmyànà awu wèpi? Ne muntu wa mpolondo wa mamanya a mu mutu awu wèpi?”

“Nzambi ùvwa kumutù kwetu, ne Mòsà, mu kaacipuka kàà kàlàkuka kapyà; Yèyè kutùdìisha manà, a ku Dyulu. Yèyè wèndì neetù munda mwa bidimu bisatu ne yisambombo...bidimu bisatu ne ngondo yisambombo, pa buloba apa. Kadi mpindyewu Ûdi munda mwànyì. Udi wakula ewu kì mmèmè to; n’Yèyè. Ndi mumanye ne Yèyè ùdi Nganyì, ne ndi mumanyè ne mèmè ndi nganyì. Mèmè ncicyenàku to; n’Yèyè.”

Lwàyi nendè kaaba aka! *Nwènu beena Izaleela, ne ... nwènu bàdì basòmbèle* mu Yudààyà, eci *cìmanyiibwè kunùdì*—*cìmanyiibwè kunùdì, ne tèèlejàayi dīyī dyànyī*, nwènu bònsò bayiishi ne baalaabi.

Yoyòyò! Ekelekele! Bukolè bwa mu dyakula! Kaa! “Bantu aba kì mbakwàcìke maalà to!” Wàkwila banyààbanyà abu’s, lukàmà ne makumi abidi abu, bibèngàngàne ne binunu dikumi anyi bapite apu.

...bantu aba kì mbakwàcìke maalà to, *munùdì* nwènu *nucínka* amu, pa kumòna ne tucidi anu pa *dìbà citeema dya ditùkù*.

Mêmè ndi muiyiishi wa Evanjeeliyo mu kaabujimà.  
*Kadi eci ncyàkambàbo kùdi mupròfetà Yowèlà;*

*... nebyènzekè mu matùkù a ndekeelu, mùdi Nzambi wàmba: Nèngìcikijè... Nyuma wanyì (yoyòyò) pa mubidi wònsò, ne beenu... Nwènù kanwènakù bamòne Màriyà mwaba awu ùja maja mu Nyuma, wàkula mu myakulu ne wènza bintu bya mushindu awu anyì?... pa mubidi wònsò:...*

*... ne pa basadidi bàànyì Nèngìcikijè... Nyuma wanyì;...*

*... Nèndeejè bimanyinu mu maulu muulu, ne... pa buloba mwinshi;... makunji a kapyà, ne mabungi a mîshì:*

Nzambi ùvwa mu bantu Bèndè díbà adi. Amen.

“Ee, mpindyewu, wèwè utu mupetè dipòlomè kaayi? Mpenyì, mmu cilongelu kaayi mùdi mupàtùkile?”

<sup>99</sup> “Aci kacýèna ne cidìci cìshintulula to bwa mpindyewu ewu.”  
 Kaa, ki kubangayè kwicikija Mifùndu’s.

*(Davidi wàkadyànjila kumumòna!)... Mukalenge misangu yònsò kumpàlà kwànyì... ncyàkunyungishiibwa nansha;...*

*... kabidi mwoyi wànyì wàkacyònkómoka, bwalu... ne ludìmi lwànyì lwàkalwa ne disànka;*

*... yèyè kààkushìya musùùkà wànyì mu iferno, anyì yèyè kaakwanyisha bwa Wa Cijila wendè àmonè dibola nansha.*

*... lekèlaayi ngààkuleku neenù mudilekèlèle bwa nkambwà Davidi, ... yèyè mmufwè ne mujiikùibwe, ne majambu èndè àdi àsanganyiiibwa munkaci mwetu... leelu ewu.*

Kadi bu mupròfetà... yèyè wàkamòna dilwa dya Mwakàne Awu.

*... ne bimanyiibwè kunùdi ne, Nzambi mmuwijè Yesu umwèumwè ewu, Unùdi nwènù bapoopèle pa nkùrusè ku byanza bya Iwonji, Mukalenge ne Kilisto. (Amen!)*

<sup>100</sup> “Balùmyànà ne bânà beetu, citùdi mwa kwenza ncinyì bwa twètù kusùngidiibwa?”

*... kwambayè ne: Nyingàlalaayi, yònsò wa kunùdi, ne nùbatiijiibwè mu dìnà dya Yesu Kilisto bwa dílekelediibwa dya mpekaatu yenu, nenku nenùpetè kupà kwa Nyuma Mwïmpè.*

*Bwalu mulayi wùdi kunùdi, ne kùdi bânà beenu balela, ne kùdi aba bàdi kule menemene, mu bungi*

bwònsò *bwàbìkilàbo kùdì Mukalenge Nzambi wetù abu.*  
(Amen.)

<sup>101</sup> Bu mùcìdì anu Nzambi ne cisàmbà, Nzambi ùdì anu ne Ekeleeziya, Nzambi ùdì anu ne Nyuma Mwímpè udi wenda Nendè. Kì cyàkafidilà Nzambi Nyuma Mwímpè ncyôcì aci. Beena mamanya a mu mitù nebàjuukè; bàtu anu bajuukèjùùke misangu yònsò. Kadi Nzambi ùdì ne banyààbanyà mwaba kampànda. Nzambi ùdì ne Ekeleeziya mukese watungunuka ne dibàtiiza dya Nyuma Mwímpè, bwa kwamba kujaadika Bukênkè. Nenku bôbò abu, ku bujaadiki bwabo, ki bàalumbulwishà bàà pa buloba.

Bible kî mmwambèku ne Yesu mmwambè ne: “Bàà disànka ng’aba bàdì batòòke mu mwoyi; nebàmonè Nzambi” anyi? Ne Yèyè kèna wàmbakù, ne: “Baakàne, bansantu, nebàlumbulwishè buloba” anyi? Cya bushuwa’s.

Bujaadiki bwenu leelu nebùtwalè dilumbulwisha pa cimenga eci. Bujaadiki bwetu bwa Nyuma Mwímpè ne Bukolè bwa Nzambi, nsòmbelu wa cijila, nebùtwalè dilumbulwisha pa cimenga. Pìikalà eci. . .

<sup>102</sup> “Aba bàdì bàà kumpàla nebiikalè bàà ndekeelu; aba bàdì bàà ndekeelu nebiikalè bàà kumpàla.” Ncyàkumanya kantu nansha kàmwè bwa Sankey ne Moody to, mu dibìikà dyabo dya ku lufù. Bôbò kabààkumanya kantu nansha kàmwè bwànyì mèmè to, mu edi nùнку. Kadi mèmè nêngùimanè mu edi nùнку, bwa kufila bujaadiki; ne wèwè pèèbè.

Nenku ku cyôcì aci, ku dimwagalaja dya Bukênkè bwenu, ne ku dibàtiiza dya Nyuma Mwímpè, ne ku nsòmbelu yinùvwà naayì, ne ku bintu bìdì Nzambi mwenzè bwa kujaadika ne Yèyè ùdì ùkwàta mudimu kaaba aka; kadi ne mamanya àbò a mu mitù, mbayè kule naaBù; bôbò nebàlumbulwishiiwbwè kùdì bansantu. Bôbò mbamana kulumbulwisha. Mbamanè kupicìlakù. Kaa, ekelekele!

<sup>103</sup> Mvwa ngaakula pa Bukolè bwa disambila, Bukolè bwa mu dyakula, Bukolè bwa nsòmbelu wa cijila. Amen. Kì cidì Nyuma Mwímpè ne cya kwenza ncyôcì aci.

<sup>104</sup> Bàmwè bàà kunùdì bàdì bènda bèndakana, nwamba ne: “Ee, ncyèna anu mwa kulekela dinwà dya maalà to. Ncyèna anu mwa kulekela dyanza dya *cikampànda* to.”

Nyuma Mwímpè ùdì ùlwa s’mbwà kusòmbela munda mwebe, bwa kwenza ne byònsò bya ne *ncyèna mwa* abi bikuumùkè. Ncyà bushuwa’s. Kulekeesha bakàjì dikòsa dya nsuki yabo, kubàlekeesha divwàlà dya tùpùtulù ne mìpanù. Kakùyì tubingilà to. Kubàlekeesha kabwabwa. Kaa, eyowa’s, ki bwa cinyi Yèyè ùdikù, bwa kukupèesha nsòmbelu wa cijila. Yèyè neàlonda dileeja dya njila dya Bible dībà dyònsò.



105 Mukàjì kampàndà wàmba ne: “Kùdi anu luuyà lukolè be; bikèngela anu mvwalè byòbì ebi. Bidi bìnsaamisha mutu mémè mulekéle nsuki yànyì yileepa.”

Kadi kakwèna tubingilà kùdi Nyuma Mwimpè to. Yèyè ùdikù mbwà kucyènza nanku. Yèyè neàlonda Dìyì anu menemene. Ki cìdì Nyuma Mwimpè ne cya kwenza ncyòcì aci.

BùdiYe naabù mbwà kunùfikisha nwènu balùme ku kutùma mpàlà kwa cyanààna bwa kubènga kutàngila bakàjì bàdi bavwàle bu bàdi kabàyi bavwàle abu, ne kulekela dibààlakana, ne bidimba bya ekeleeziya. Ki cìdìYe ne cya kwenza ncyòcì aci.

106 BùdiYe naabù mbwà kukulekeesha dinwà dya mfwankà ne maalà, ne kwikala...kujinga kwikala muntu wa mushinga munene. Yèyè neùmushè aci mu wèwè. NeÀkuvwijè mudipwekèshe paùdi wenza nanku. Ki kabingilà kàà Nyuma Mwimpè nkòkò aku. Ùdi bwa nsòmbelu wa cijila. Ncyà bushuwa. Ùkulekeesha bijaanu. Ùkulekeesha kunaya kwa twarta, kunaya kwa mibèlà, ne bintu bikwabo byònsò byùdi wenza mu musokoko ebi.

NeÀkulekèeshè dyenza dyebe dya bintu bya lukutukutu mushindu wùdi ubyènza awu, kùyi ne nsòmbelu wa lulamatu kùdi mukajèbè to. Ki cyènzaYe ncyòcì aci. Ncyà bushuwa. NeÀkulekèeshè diswa kusela mukàjì wa bendè. Ncyà bushuwa menemene.

Ki cìdìYe ncyòcì aci. Ùdi ùkufikisha ku diikala ne nsòmbelu wa cijila. Nyuma Mwimpè ùdi Bukolè mbwà kabingilà aku, “kutèèka majinga èbè ku bintu bya mu Dyulu,” mùdi Nzambi mwimàne ku...?...meeji a Kilisto munda mwebe. Kwèna mwa kudìpangisha bwa kumòna bintu abi to; paùdi ubitàngila, udi utùma mpàla kwa cyanààna. Ncyà bushuwa. Ki cìdìYe ne cya kukwenzeja.

107 Wèwè udi wamba ne: “Ncyèna mwa kucyènza to. Kaa, ncyènà anu mwa kucyènza to.” Cya bushuwa, wèwè kwèna mwa kucyènza to.

Kadi Nyuma Mwimpè mmulwe mbwà kiipàcilà aku. Ki cìdìYe mwenzè. Yèyè mmulwè bwa kukuumushaci, biibidilu byònsò bya kale ne bintu byùdi wenza abi.

Dyamba dya maalu mabì a bakwabo adi, uditàpulula, wamba ne: “Nzambi àbeneshiibwè, mémè ndi Méthodiste, ncyàkwikala bwalu ne bansantu bàà kale babùnguluki bàà mu malaba abu nansha.” Nyuma Mwimpè mmulwe mbwà kukuumusha bya nanku abi.

108 “Mémè ndi Baptiste. Mémè ndi Presbytérien. Ncyèna mufwànyìnekù kuya kùdi kaamusumbà kàà kale kàà bansantu babùnguluki bàà mu malaba aku to.” Nyuma Mwimpè mmulwè mbwà kukuumusha dyumakana dyònsò adi. Ki cyàkenzaYe. Ùdi

ùkusukula mu Mashì; ùkukoma ùkwolola. Kì cìdìYe mulwe bwa kwenza ncyôci aci.

M'Mulwe bwa kukululamija. Yêyè wàkamba ne: “Lulàmijàayi myaba mikònyàngàle.” Kì cìdìYe mulwe bwa kwenza ncyôci aci; kucyàkaja. “Kupwekesha myaba yìdì mibànde muulu; kwenza bwa mikùnà yònsò yimwekè bu ne yìdì yìja maja bu tukùngùlù twa mikooko, ne mabèji ònsò àdì àtuuta bikàshi, bwebe wèwè.” [Mwanèètù Branham ùdì ùtuutakaja byanza—Muf.] Tunyuunyi tùdì twimba bishìilàngàne. Ngonga ya disànka yìdì yìdila. Kakwènakù tubingilà to. Kì cìdìYe mulwe bwa kwenza ncyôci aci. Kì kiipàcilà kàà Nzambi mu kutùmà kwa Nyuma Mwìmpè, bwa wamòna mwa kwenza bintu ebi, bwa wamòna mwa kukwàta mudimu wenda uMulonda.

<sup>109</sup> Mpindyewu ncyèna muswe kunùtapa ku mwoyi to, kadi mvwa munwàmbìle ne ndi kaaba aka ne meeji matòòke a matàmbe kwikala a ndòndò. Bwa kubènga kunwònya bizàdì, ku musangu ne ku musangu ndi ntùpikila pa kaaba kampànda; ne kushààla ne Bulelèlè, kadi kushààlapù ne kucivwija mu mushindu wà kacìyi cìnwònya bizàdì bya bikolè menemene to.

<sup>110</sup> Kadi ndi muswe ntwàmbìlèku cintu kampànda. Bible Yêyè wàmba ne mbibì bwa mukàji kukòsayè nsukì yèndè, ne wèwè wamba ne udi ne Nyuma Mwìmpè kadi pashìishe ukòsa nsukì yebe, mèmè's ndi ndìkonka ní udi Nèndè. Kùfiiki munda to; wèwè mufiike munda, aci cìdì anu cileeja ne kùdì cintu cikwabo cibì kùdì.

<sup>111</sup> Bible Yêyè wàmba ne mbibì bwa muntu mukàji kuvwàlayè civwàlù cya cikùmbànyine muntu mulùme, kadi wèwè uvwàla tuntàkanyì twà tunsàlàbeetà ne tùpanù atu pambèlu apa mu njila, nwènù bakàji bakolè aba! Ngeela meeji ne mwànà mukese kaayi mmufwànyìneku kwikala yèyè. . .cintu, ùnàya ne twànà twà balùme tukese ne bikwabo. Kadi, tàngilàayi, panùdì—panùdì nwènù bakàji bakolè aba, bàà bidimu dikumi ne bitaanu, dikumi ne bisambombo, dikumi ne mwandamukùlù, too ne ku baakaakù, pambèlu apa mu njila! Pèndè's Bible mmwambè ne: “Ncinyangu ku mèsù kwa Nzambi,” bwa muntu mukàji kuvwàlayè bintu abi. Kadi wèwè nyawu udi ubìvwàla, nansha nanku, kadi wamba mùdì ne Nyuma Mwìmpè? Mèmè's ntu ndìkonka mìngà misangu. Nyuma Mwìmpè's neàlondè Dìyì dya Nzambi ku dìleetà ne ku dìleetà.

Kadi muyiishi mu cyambilu, udi kàyi ne ngàsà bùngì bukùmbàne bwa kuCìyiisha, mèmè ndi ngeela mpatà bwa ne ùdì Nèndè. Aci's mbushuwa menemene! Ee, Nyuma Mwìmpè's ùdikù mbwà nanku.

<sup>112</sup> Yêyè ùdikù mbwà kufila dilaabiibwa kùdì muyiishi. Ùdikù mbwà kufila cijila kùdì cisumbu aci. Ùdikù mbwà ku kutèeka Ekeleeziya mu bulongàme. Ùdikù mbwà kutwàla bwobùmwe bwa Nyuma. Ùdikù mbwà kutúsanga pàmwè ku Bukolè abu.

Ûdikù mbwà kutùsanga pàmwè ku dinanga, dinanga dya bwàna bwetu.

Nansha wêwè Méthodiste, Presbytérien, Luthérien, cyònsò cyùdi aci, piikalàbi ne twètù bònsò tudi babàtijiibwe ku Nyuma Mwímpè umwe mu Mubidi wumwe, ne balwè bidimba bya Mubidi wà Yesu Kilisto, kakwèna . . . kakwèna cintu nansha cimwe cidiku mpindyewu, cintu nansha cimwe cya matùkù àcìvwavwà; nzala, ciyòole cya nzala; cintu nansha cimwe kaciyèna mwa kutùtápululakù ne dinanga dya Nzambi, dinanga dya Kilisto, “dinanga dya Nzambi didi mu Kilisto” to, bwalu tudi balediibwe ku Nyuma Wendè, basukùdiibwe mu Mashi Èndè. Tudi cifùkiibwà cipyacipyà. Ki cidi Nzambi mulwe bwa kwenza. Ki kiipàcìlà kàà Nyuma Mwímpè nkòkò aku. Eyowa’s, mukalenge. Ki cyòci aci.

<sup>113</sup> Mpindyewu, nwènu cisàmbà, ntàngilaayi, mumpàla. Byanza byàbùngì bìvwa byediibwe muulu ne, nudi ne Nyuma Mwímpè; nwamònu’s, cya bushuwa, ki mùvwàbi. Kaa, mpindyewu nèngìikalè—nèngìikalè anu mwa kutontololaku kakese mwaba ewu. Eci cidi cìkwàciibwa pa mikàbà ya mèyi. Kadi netùkùsàkidilè kabidi byàbùngì màalabà dilòdòlò.

Wêwè wamba mùdi Nendè, kadi mwikàle mupiile ku bintu ebi, ndi ndìkonka ne cidi cikulombolà wêwè ncinyi. Nzambi kààdyàkukulombolakù pambèlù pàà Dìyi nansha. Yèyè neàkulamè ne Dìyi, bwalu aci ki mikenji ya Nzambi Sungasunga, ya Ekeleeziya Wendè, bwa cisàmbà Cyèndè, bwa bakàji, ne bwa balùme.

<sup>114</sup> “Ee,” mùdi wêwè wamba, “kabyèna bingenzela mèmè bibi bwa kwenza *cikampànda* anyi *cikansanga* nansha.” Kaciyi cìkwenzela bibi? Dìyi’s didi dyàmba ne cidi cìkwenzela bibi.

Kadi Nyuma Mwímpè Yèyè munda mwebe, Yèyè’s neàkulombòle buludi ku Dìyi. Kakwàkwikalakù tubingilà to. Nzambi kàtu ùtwàla mashintuluka anyi tubingila nansha. Yèyè ùdi ùfùnda cimanyinu ne wêwè ucitùmikila. Kwàjiki. Ki cidiku bwa bantu bònsò. Nudi nulonda njila umwèumwè awu.

<sup>115</sup> Peetèlò wàkamba ne: “Nyingàlàlaayi, yònsò wa kunùdi; nùbatijiibwè, yònsò wa kunùdi, mu Dìna dya Yesu Kilisto bwa dilekelediibwa dya mpekaatu yenu, pashiishe nenùpetè kupà kwà Nyuma Mwímpè.” Nwamònu anyi? Ki cyòci aci. Bidì bìkèngela bwa twètù kulonda njila awu.

<sup>116</sup> Mpindyewu ncyèna ne meeji a kunùtapa ku mwoyi nansha; ndi munùangè bikolè be. Kadi, mwanèètù wa balùme, mwanèètù wa bakàji, nudikù nufika ku dyumvwa ne, ne . . . ne ndi mumanyè ne nèngìikalè ne cya kwimana mu matùkù a ndekeelu ku dibìikà dya ku lufù, pàmwè ne lukòngò lwà bantu elu, bwa kulumbulula bwa Dìyi edi anyi? Ne Nyuma Mwímpè ùleeja cyòci eci, ne mèmè nCìyiisha kuntwaku, kuwikalà mwà kwimana mpenyi? Mmunyi muwàbèngà kunyookiibwa bwa

bwalu abu? Kwênàku mwa kubènga kunyookiibwa to, mulundà wànyì. Kùcyénjiku to. Mpindyewu imànyika cintu aci. Cyònsò cyùdi wenza cìdì cibì aci, cìmànyìke.

Wèwè udi wamba ne: “Ncyèna mwa kuciimanyika to.”

Nanku kwèna mwanjì kwikala ne Udi-mwa-kwimanyika awu munda mwebe to. Pàdì Nyuma Mwîmpè ùlwa, Yèyè ùdi ùkupèèsha Bukolè kumutù kwà maalu a pa buloba. Ne pawikalà . . . Tèèlejà cìdìYe Yèyè mwambe. “Wèwè unanga maalu a pa buloba anyì bintu bya pa buloba, mbwalu dinanga dya Nzambi kadyèna munda mwebe to.” Mpindyewu, kakwènakù tubingilà to. Yèyè ùdi ucìvwija citòòke tòò, ne bìdì bikèngela bwa twètù kufika ku cimanyinu aci.

<sup>117</sup> Ndi mumanyè ne nudi nwela meeji ne ndi mubì be. Kadi ndi anu mùle bibì be patùdì twakulangana apa. Nwamònu anyì? Tèèlejàayi. Aci ncilelèlè. Mpindyewu seemènà kùdiYe, mwanèètù wa balùme, mwanèètù wa bakàji.

<sup>118</sup> Kùlekedikù cimwe cya ku bilongelu bitùmbùke bya mamanya a mu mitù bìdì muneemu ebi bikwambila ne: “Kaa, abi’s mbintu bya bantu bàà meeji a cyena kale.”

Byòbì ne mbintu bya bantu bàà meeji a cyena kale, nanku Nzambi’s mmuntu wa meeji a cyena kale. Nenku pìikalà Nzambi muntu wa meeji a cyena kale, nanku’s kì cìndì, mèmè pàànyì. Amen. Mèmè ndi muswe kwikala bu Yèyè. Bwa cinyì? Nyuma Wendè ùdi munda mwànyì, mwikàle ne nzala ne nyòotà, ùbìikila cyònsò cìdì cibèngàngàne ne Dìyì ne . . .

<sup>119</sup> Bantu bòbò bàmba ne: “Mbîmpè bwa, kaa, bu muntu mwa kunàya ndambu twarta bwa kuumushakù luteetùkù, ne ùnàyakù anu bwa lufwàlangà lumwe anyì yibidi cyanàànà. S’bìdì anu bîmpè.” Nzambi ùdi wamba ne kì mbîmpè to.

<sup>120</sup> “Kaa, bu wèwè kwangatakù anu twalà twîmpè twà mu nsòmbelu etu, ne kukwàcìkakù anu kakese cyanàànà, ku musangu ne ku musangu.”

Kadi Nzambi mmwambe ne: “Dyàkabi dyèndè.”

<sup>121</sup> “Kaa,” mùdì wamba, “s’bìdì anu bîmpè, Mwanèètù Branham. Ndi—ndi—ndi nkòsa nsukì yànyì bwa cintu cya bushuwa. Muntu mukàji, udi mumanyè’s, bakàji bakwabo aba’s bàdì bàcyènza.” Cìdì bakàji bakwabo bènza nansha ciikàle cinyì. Bòbò abu kabèèna cileejilu cyebe anyì kì mbamfumu beebe bàà mudimu nansha. Wèwè ne Nyuma Mwîmpè munda mwebe, neùlonde dileeja Dyèndè dya njila cìdì bantu bàmba bwebe wèwè nansha ciikàle cinyì.

<sup>122</sup> “Ee, Mwanèètù Branham, kùdi luuyà lukolè be, nenku bikèngela anu mwalè tulàmbà twà *bikampànda* etu.” Iferno’s ùdi ne luuyà lukolè lutàmbe alu, mwanèètù wa bakàji. Lekèlè nkwambilè nanku awu. Nenku—nenku kwidìkijikù to. Úvulukè aci.

123 Ne Nyuma Mwïmpè neàkulombòlè misangu yònsò anu ku Bulelèlà, ne Bulelèlà Bwèndè n’Diyi. “Diyi Dyànyi didi Bulelèlà. Diyi dya muntu yònsò diikalè mashimi, kadi Dyànyi diikalè dilelèlà.”

Kadi anji elàbi meeji, “cinyangu.” Udikù mufwànyine kwela meeji anyi?

124 Ewu mmwakù wà bwalu bukolè be bwa mwambi wàmba’s, kadi nkàadi mubwelèbwèle mu nkumba ya myaba yidibi bifwànyine anu. . . S’mbifwànyine kukèngela kwalukila pambèlu, s’udi muswe nansha kwalukila, bivwa mmùmwe ne. . . Ne bintu bya manyaanù ku cimanu. Mémè kudyàmbidila ne: “Nansha twamba mwine mmunyi mùdiku bantu mwa kwikala bàà ciipanshi mushindu ewu?” Mupùùyà mubolè wèbè wà! Ne pàndi mbwela mu myaba ayi, ntu misangu yàbùngi ndyàmbidila ne: “Mupùùyà mubolè kaayi ewu!” Mvwa mwa. . . Mwômò amu, mvwa mwa kwikala mudikwàte ku dyùlù mushindu ewu, bwa kuseesuka. Mvwa ne bwòwà bwa ne nkwepi kùmvwà mwa kukwàta ku cikwàcilu cya ku ciibi, cyàkàbidì ne, kùvwa kufwànyine kwikala twishì twa màsaamà a màsàsà ne bikwabo. Ki mémè kudyàmbidila ne: “Kaa!”

125 Dìngà ditùkù, mémè mwimàne ku cipalu cya ndèkè, wumwe wà ku myaba yínkaadiku mubwelè ayi, anyi ngàlà wa njila ya njanja, mémè kubwelamù. Ki mémè kudyàmbidila ne: “Kaa, luse wè!”

126 Ki Cintu kampànda kungambila ne: “S’ki mùdi buloba bùnunka nanku bwa Nzambi. S’ncinyangu.”

127 Mémè kudyàmbidila, pàndi mmòna muntu mukàji wènda ùpweka ne mùsèèsù, ùzèleka yèyè yònsò ne ngendu mushindu awu, mwine awu muvwàle bilàmbà bya bantu balùme ne, ki mùdici cimwènèka kùdi Nzambi nanku. Ncinyangu, cintu kampànda cya cikooyike ne cinunka mupùùyà mubolè, kumpàlà kwà Nzambi. Cibì, mukàji awu neàye mu ekeleeziya mu dyàlumingu, mudilèngèje bìmpè.

Nekùye muntu mulùme kampànda mwômò amu, wa ùnwa maalà, wìbila, ne munangè mfranga, ne wìbila kùdi mwena mutumba nendè, ne bikwabo byònsò, bwa kupetakù mfranga ya pamutu; nenku wènza bintu ebi, ne ùnàya manàyi a mfranga, ne ùnwa mfwankà, ne ùnwa maalà, ne ùshima; ki pashìishe ùya mu ekeleeziya ùkafila bujaadiki. Cinyangu! Bukooyà! Awu’s ng’ekeleeziya wa mamanya a mu mitu.

128 Wàmba ne: “Ee, mémè’s ndi wa mu ekeleeziya.” Eyowa’s, ne bìkèngela bwa kupàtulakù beena mu ekeleeziya amu, tusunsa dikumi ne tutaanu, bwa balami ne bakwabo bònsò bàmonèku mwa kunwà mfwankà, ne mpaasàtà pèndè, kumpàlà kwà nwènù kwalukila ne kutùngunuka ne masangisha. Ngambilaanyààyaaku mwaba awu! Tàpulukà ne cintu cyònsò cya bukooyà!

<sup>129</sup> “Kooyishaayi mubidi; Mémè nêngùbùtùlè.” Nzambi ngudi mwambe ne Yèyè neàwùbùtùlè. Nenu leelu ewu, ku disaamà dya kànsèrè, didi difila bya pa lukama makumi citeema ne bya mu njila bya lufù, kànsèrè kàà pa muminu ne kàà mu bisùlùsùlù, mbikèba kùdì dinwà dya mfwankà. “Kooyishaayi mubidi; Mémè nêngùbùtùlè.” Kadi bàdi mu njila batàngìle mu iferno mu mushindu wa dikèma, bènda bàbùnguluka mushindu awu, kabàyi bamanyè to.

Kadi muiishi kampànda mwimàne mu cyambilu ne màpòlomè anaayi, a mu cilongelu citùmbùke, ùnwa mfwankà, yèyè mwine awu. Lekèlè nkwambìlèku cintu kampànda, mwanèètù. Nyuma Mwìmpè wàkatùmbwa mbwà kubiikila balùme ne bakàjì bwa kupàtukabò mu cintu aci. Tàpulukà!

Mwàkù *ekeleeziya* mbwena kwamba ne kwikala “mutàpùlùke.” “Pàtukàayi munkaci mwabo,” mùdì Bible mwambè. “Kanùlengi cintu cyabo cibìipe aci to, nenu Mémè nènwnwàkidilè; nenu nenwikalè bânà Bàànyi bàà balùme ne bàà bakàjì, ne Nèngiikalè Nzambi kunùdì.” Kaa, ekelekele! Ncyèna ne meeji a kwikala ne lwonji to, kadi ndi muswe kwikala ne meeji matòòke ne kwamba bulelèlè. Eyowa’s, mukalenge. Kaa, cintu kaayi cibì’s wè!

<sup>130</sup> Balùme ne bakàjì, tudi panshi anyi tudi pa kazubu leelu ewu? Tudi penyi? Twimanyikàayi.

<sup>131</sup> Dilòlòlò adi, dyàmwàmwà dya nkwasa mukese wa kale mu cibambalu mwàmwa, (nenu ndi ne cya kwimanyika), nkwasa mukese muleepa wa panshi. Paanyimà pàà mumanè kusambila matùkù asatu anyi anaayi, ki mèmè kufika mu kaaba kampànda, ngenda nyùnguluka, ne ndyàmbidila ne: “Éyi Nzambi,” ne mèmè kufika mu mushindu wà ncìiyi mmanya cya dyanza to. Mémè kwamba ne: “Nzambi, nyewu tukàadi ku ndekeelu kwa njila. Ne ndi mufikè ku dyumvwa ne ndi mulèngùlùle. Ndi mupetè mabiikila a diya kakùmbulangana, kadi mwikalè mucyòke, ne ncìiyi muswe kucyènta to.” Mémè kwela meeji dìbà adi ne mvwa mwa kumòna Mukalenge wanyì wènda ùtetuka mu mîdimà mwàmwa, pàvwàYe mucyòke bikolè mu mushindu wà Kàyikù ne mwa kwambula dikàsà ne kwambula dikwabo to, kadi Kàvwa mutàmbe. . . KwimanaYè bwa mukàjì wa ku Nayinà awu, dìbà adi bwa mwànà wa balùme uvwabò bàya nendè kuntwaku uvwa mufwè awu; too ne mwàkayàYe ne kulenga mushèètè wà bafwè awu, ne kukwàta mudimu ne kaadikàndà kakesèè kàvwà munda Mwèndè aku bwa kajuula mwànà wa balùme awu. “Ee, mèmè ndi mufikè ku dicyòka munyi? Mbwalu kaayi ebu naanyi’s, Mukalenge? Ki mèmè ewu ukàadi wela meeji ne: ‘Ee, nkàadi ngenda nkùlakaja. Ncyèna—ncyèna mwa kucyènta to.’”

<sup>132</sup> Kùvwa Mòsà, anu ne Nzambi umwèumwè ùndì mèmè nkwàcila mudimu ewu, wàkiimana kuntu kwàka, ne bidimu lukàmà ne makumi abidi.

Kùvwa Kaalèbà, mwimàne ne bidimu makumi citeema, ne mwelè wà mvità mu cyanza, kwambayè ne: “Yoshùwà ngwàkantèèka mwelè wà mvità ewu mu cyanza, kùkaadi bidimu makumi anaayi.” Úvwa ne bidimu makumi mwandamukùlù piine apu. Yèyè ne: “Ndi muntu wa bukole leelu ewu anu mùmvwà mwine musangu awu.” Amen.

Mémè kwamba ne: “Nzambi, ikàlàku naanyi luse.”

<sup>133</sup> Mémè ne: “Ee, tàngilà kùneeku, ndi misangu yònsò anu . . .” Ki mémè kukwàta mukàjàanyi (udi paanyimà pàapa wàwa) ku cyanza, ewu dyàmùnù dya ewu dya mwàmwà dya Bible ewu ne wendè Bible mukese awu, mémè kwamba ne: “Munanga wanyi, nkàadi mulwè wa meeji a lubòko be. Nyuma Mwimpè nyewu ùmpisha munda mwànyi emu.” Mémè ne: “Ndi mvùluka nshìndi ayi kuntu kwàka. Ndi mvùluka Hattie Wright kuntwaku, ne bàna bàà balùme bakese abu. Ndi mvùluka bikaadi Nzambi mwenzènze, ùleeja ne Yèyè n’Nzambi, uvwa mwa kufùka awu.” Aleluuyah!

Mémè kudyàmbidila ne: “Yèyè’s ùkaadi mungambile aci, kùkaadi bidimu ne: ‘Ncyàkukushiya to. Ncyàdyàkukulekelelakù to. Muntu nansha umwe kàakukukàndameenakù to, matùkù èbè ònsò a mwoyi. Mémè nêngìikalè neebe. Ne kubangila ku dijingulula dya ku cyanza edi, nebikafikè ku ne neùmanyè too ne bwalu busokòmè bwa mu mwoyi. Paanyimà pàà cyòci aci, necitambè kwikala cibànda anu kubànda.’ Cidimu paanyimà pàà cyòci aci, kujaadikiibwaci anu menemene, buloba bujimà. Mwab’ewu, ki mukwabo mudimu munene wà bwambi wùlwalwà ewu, mucitàmbe kule ne kule.”

Mémè kwamba ne: “Munanga wanyi, ndi nkukwàta ku cyanza. Ku dikwàcisha dya Nzambi ne ku ngàsà wa Nzambi, kùndekèdiku kabidi ne meeji lubòkò to. Ngèndè nye too ne ku ditàbuluja edi bwa kuyiisha bitàmbe ne kacya kwònsò eku. Nye mwaba ewu, bwa kwanji kudijidila mémè mwine, ne kusebeela bakwabo njila; bwa mpekaatu yànyi mémè mwine ayi, kalèngù kàanyi mémè mwine aku bìikalè mwinshì mwa Mashì, bwa mapangila àanyi kwikalawù mwinshì mwa Mashì, bwa ngaamònakù mwa kupàtuka ngamba ne: ‘Ndondàayi, nwènù bantu.’” Ncyà bushuwa.

Ntu ngumvwa bingenza bibi bwa kumòna muntu wàmba ne: “Nda wèwè ùkacyènze.” Mémè ntu muswe muntu kampànda wàlombola njila bwa kucyènza. Eyowa’s, mukalenge.

<sup>134</sup> Mùneemu emu kùkaadi ntàntà, twàkapeta mudilu mu cimenga emu, Kùmpànyi wa Pfau Oil kukwàtayè mudilu. Kubìikidishabò beena mudimu bàà Dijimà dya Midilu bàà mu Jeffersonville. Kadi mulundà wanyi kampànda, muntu mwimpè, kacya kàvwakù yèyè mwibidile midilu ya minène mushindu awu to, ùvwa ùnyùnguluka kuntwaku, wàmba ne: “Sòmfwelàayi

ndambu wa mâyi *apa*, balũmyànà, sòm̄pwelàayi ndambu wa mâyi *apa*.”

Ki beena ku Clarksville mukese bàlwalwà bàba ne, “ding, ding, ding, ding,” bàlwa lubilu kuntwaku. Ki kwambayè, mfumu wa midilu ayi ùtùpika panshi, wàm̄ba ne: “Sòm̄pwelàayi ndambu wa mâyi *apa*. Ùpùlaayi didìdiishì *edi*. Sòm̄pwelàayi ndambu wa mâyi *pàapa*.”

<sup>135</sup> Kadi dyàm̄wàm̄wà dya musùlù kulwakù bajìmi bàà midilu balongesha bìmpè bàà mu Louisville. Ndòbò munene awu ne cibàndilu kabiyi byanji kwimanyika to mfumu ùkaavwa ku lusongo lwa cibàndilu aci. Pààkabàndà cibàndilu aci, yèyè ùkaavwa kumutù aku. Kukùpayè kasuuyi kèndè kumpàlà kwa kubàndayè, ne kutùulayè didìdiishì adi, kwambayè ne: “Lwâyaayi, balũmyànà!” Ki bwalu abu’s. Mudilu wùm̄ba wùjima mu tusunsa tukese.

Kabiyi bya ne: “Sòm̄pwelàayi ndambu wa *apa*. Sòm̄pwelàayi ndambu wa mâyi *pàapa*” abi to. S’cidi cìnùvùlwijakù, bàmwè bàà ku bayiishi bàà mamanya a mu mitù abu’s.

<sup>136</sup> Lwâyi! Katùyaayi! Mèmè ndi mumanyè ne Cìdi Bulelèla. Nkààdikù muteetètèète ne mumònèmòne. Butùmbi’s wè! Nyuma Mwìmpè ngwa cya bushuwa. Nzambi mmwìmpè. Kanùteeci *apa*, kuteeta *pàapa* to; túbwelàayi munda mwèndè! Yèyè ùdi kaaba aka. Cìdi bwènù nwènù. Nzambi mmupèeshe Ekeleeziya Wèndè Bukolè Bwèndè. Kì mbya kusòm̄pwela *cikampànda* apa, ne kusòm̄pwela *pàapa* to; kanwàdyàkwenzakù cintu to. Lombòlaayi dikàsà! Amen. Uh! Yoyöyò! (Ncìcyèna mmwèna kabidi mu byòbi to.)

<sup>137</sup> Amen! Citwikalà mwa kwenza ncinyi? Muntu yònsò udi musòm̄be kaaba aka mmùle tètè ne cintu kampànda.

Pashìshe nengìikalè mwa kwimanyika; bìdi mwa kukèngela bwa mèmè kwimanyika, paanyimà pàà cyòci aci.

Wèwè udi mùle tètè ne cintu kampànda. Kwèna mwa kwikala musòm̄be mwaba awu kùyì mùlè tètè ne cintu kampànda to. Udi ne mwoyi kampànda munda mwebe amu. Mwoyi awu ngùdi wùkulombola, ne mwoyi awu wùdi wùlombodiibwa kùdi nyuma kampànda.

Mpindyewu, udi mufwànyine kwikala mùle tètè ne maalu a pa buloba, mwikàle unanga malu a pa buloba anyi bintu bya pa buloba. Nzambi ìkalèku neebe luse.

Udi mufwànyine kwikala mùle tètè ne twitabàayi ya mu ekeleeziya kampànda, tuumasambila tukese kampànda tùtù usambila atu, udyàmbidila ne twòtù atu ntwà ditùma kùdi mufwè kampànda, anyi—anyi kudyènza cimanyinu kampànda cya nkùrusè. Nzambi ìkalèku neebe luse.

<sup>138</sup> Ne udi mufwànyine kwikala mùle tètè ne ntèdeleelu, aci kadi ki citàm̄be bubì. Neya bushuwa. Neya bushuwa. Bible



mmwambè ne: “Mu matùkù a ndekeelu nebùikalè batèndeledi bàà dikèma, bìikàle ne cimwènekelu cya difwànà dya Nzambi; bìikàle ne cimwènekelu cya difwànà dya Nzambi, kadi bàvila Bukolè bwàdi: kùdi bàà nanku umùkà.”

Pawikalà mùle tètè ne ntèndeleeleu, udi mwena dikènga; anu ntèndeleeleu nkààyendè, kwàjiki. Pawikalà mùle tètè ne twitabàayi, kwèna mumanyè cyùdi wamba aci to. Pawikalà mùle tètè ne maalu a pa buloba, udi mpofo.

<sup>139</sup> Ne, pèèbè, udi mufwànyine kwikala mùle tètè ne Nyuma Mwïmpè. Amen. Ndi ntèkemena ne bìdi nanku. Kadi, kùyi nanku to, ndi ntèkemena ne neùjiibwè. Nenku pawikalà mùle tètè ne Nyuma Mwïmpè, cyùdi naaci ncinyi? Udi ne Bukolè. Udi ne dinanga. Udi ne ditalala. “Ndi nnùpa ditalala Dyànyi; Ndi nnùpa, kí mmùdi bàà pa buloba bàpa to.” Udi ne ditalala. Udi mutwibwe citampì. Udi ne cimanyinu. Amen. Udi ne diikisha. Udi ne disànka didi kadìyi kwamba, ne mùle tètè ne butùmbi. Udi mwelè lwongò. Kaa, ekelekele! Ki cyùdi, paùdi ne Nyuma Mwïmpè. Udi ne . . . Wèwè muujìbwe tètè ne Nyuma Mwïmpè: “Udi muumùke ku lufù muyè ku Mwoyi,” mwindile dibìikà dya ku lufù dya bantu bônso mu ditùkù dya ndekeelu.

<sup>140</sup> Mu buloba bùcilwalwà, ku Mukalenge wetù Yesu Kilisto, ne bàdi baMumòne ùlwa mu butùmbi ne mu ngiikàdilù wa ùkèmesha abu: “Mbù neàpatulè bafwè bàdimu.” “Mibidi ya yìbola ya bàdi balààle tulù munda Mwèndè abu neyùikalè. . .”

“Bàdi balààle tulù munda Mwèndè.” Udi ubwela munda Mwèndè munyi? “Ku Nyuma umwe nkutùdi bônso babàtìjìibwe mu Mubidi umwe.”

“Mibidi ya yìbola ya bàdi balààle tulù munda Mwèndè abu neyìshintulukè ne yìvwijìibwa mifwànàngàne ne mubidi Wèndè Yèyè mwine wà butùmbi awu, mùdiYe ne bukolè bwa kuvwija bintu byônso mwinshì mwa bukòntononyi Bwèndè.”

“Mémè kuumvwa Dìyi difùmina mu Dyulu,” mwàkambà Yone, “dingambila ne: ‘Fùnda ne: “Bàà disànka mbafwè bàdi bàfwa mu Mukalenge. . .”’” Neùbwelèmu munyi? “Ku Nyuma umwe nkutùdi babàtìjìibwe mu Mubidi awu.” ““ . . . bàdi bàfwa mu Mukalenge kubangila ku mpindyewu; bwalu bôbô mbiikishe ku midimu yabo mikole; ne byenzedi byabo bìdi cya bushuwa bìbàlonda.”” Hum!

Ki cyàkatùminàYe Nyuma Mwïmpè. Kaa, ditwishiibwa dibèneshiibwe, Yesu ngwanyì mémè! Mémè ndi munda Mwèndè, ne Yèyè ùdi munda mwànyi; Taatù munda Mwèndè, ne Yèyè munda mwa Taatù; ne Taatù munda mwànyi, ne mémè munda Mwèndè.

Yesu ngwanyì mémè!

Kaa, kàadyosha kaayi kàà butùmbi bwa Nzambi’s wè!

Mémè ndi mupyànyi wa lupàndu, musùmba  
 kùdì Nzambi,  
 Mulela ku Nyuma Wendè,  
 pângààkwoweshiibwà mu Mashi Èndè.

Amen. Ncyênàku mufwànyine kucishintakaja to. Kaa, ekelekelele!

Mabwe ónsò a rubies ne a mbongò, ne argent  
 ne ngólò,  
 Mishèètè Yèndè mmyúle tèntè, Yéyè ùdi ne  
 mabanji àdì kaàyi kwamba.

Bwalu mémè ndi mwànà wa Mfumu!  
 Mémè ndi mwànà wa Mfumu awu!  
 Pàmwè ne Yesu Musùngidi wanyì,  
 Cìdi cimvwija mwànà wa Mfumu awu!

<sup>141</sup> Amen ne amen. Ncyênàku mufwànyine kucishintakaja to. Ncyênàku mufwànyine kucishintakaja to. Ncìdi ne mikwabo Mifùnd- . . .yibidi anyì yisatu.

Pashiishe, mukwabo Mufùndù ngwówò ewu. Paùdì—paùdì muujìbwe tèntè ne Nyuma Mwímpè, byòbì abi ki bintu byùdì naabi. Dìbà adi udi cinyì, kùdì bàà pa buloba? Mwenyi. Ndi mumanyè ne dìbà dikaadi dipìte, kadi kî nditàmbekù kupita bwa eci nansha. Mwenyi! Kaa!

Tudi beena lwendu ne tudi beenyi pànwapa,  
 Tudi twenda tukèbangana ne cimenga  
 cìcilwalwà,  
 Bwàtù bwa disùngila bùlwalwa abidi àdì  
 panshi aa,  
 Bwa kukùngwija Mabwe Èndè a mushinga  
 mukole ne kuya naawù Kumbèlu.

<sup>142</sup> Ndi mwa kuumvwa mùvwà màyi àsàmpuka mu Musùlù wà Ohio mwàmwa, pàncìvwà muyiishi wa kànàkànà, wa bidimu bìipacila makumi abidi ne bibidi, ngimba musambu awu kuntwaku. Ki mémè kuumvwa, kutàngila muulu kumutù kwànyì aku, ne kuumvwa Dìyì, dyàmba ne: “Bàndulukà.” Ki Bukènkè bunène abu bùlwalwà ebu bulembèlè anu kuntwaku, bwènda bùpweka kumutù kwànyì aku, bwàmba ne: “Anu mùvwà Yone Mubàtìiji mutùmìibwe bwà kudyànjidila Dilwa dya kumpàlà dya Kilisto, wèwè newìkalè ne Mukenji wàdyànjidila Dilwa dya Cyàkabidì dya Kilisto.”

Kaa, mvwa mufwànyine kuciitabuuja munyì? Kadi cyàkenzeka anu nanku's. Ne dilòdòlò edi tupyà twà matàbuluja ki kuteematù mu nyùngulukilu ne nyùngulukilu wa buloba bujimà eku. Ekeleeziya munene mupikula wa Nzambi mmuDìpàtùle mu mwaba awu, ne tùmpanyè tunènè twa dyondopa, ne bimanyinu, ne maalu a kukèma, ne bishimà, bileeja Dilwa adi.

143 Wêwè udi wa ku baabèndè, ne udi mwenyi. Udi wenza bintu byenyi, bishìilàngàne ne byúvwà ne ciibidilu cya kwenza. Kwèna wenza maalu mùvwà ne ciibidilu cya kwenza amu to. Bantu. . .Nyuma Mwîmpè, pàdiYe ùlwa pambidi pèèbè, ne wêwè ulwa mùle tètè ne Nyuma Mwîmpè, udi ulèngulula maalu a pa buloba. Udi ulèngulula bintu bivwà kale bifwànyine kukutuucisha musòdi. Udi ubilèngulula. Dìbà adi udi ulwa cifùkiibwà cìdì—cìdì cyèna maalu a pabwàwù, kaadibata kabì kumòna, bwàbò bòbò, kaamukankù kakese kàvwà katooyisha mwinshì mu ciswa cya nzòòlo aku; kàmvwà muyiishè ne: *Nènku Pàdi Mukankù Wùsaasulula Diswa Dyàwù* aku. Wêwè udi cifùkiibwà cya mmwènekèlu wa wàci mushindu, bwàbò bòbò.

Kadi, kaa, ekelekele, ngenda mbànda ne Cibeeba cya Mfumu's! Amen. Kaa, s'n'Cibeeba ciyaayà mu Dyulu. Nènku ndi ngenda mbànda ne Cibeeba cya Mfumu.

Bàmba ne: "Tàngilàayi munsantu mubùnguluki wa mu malaba wàwa, kaadibata kabì kumòna kàka. S'mmuyiishi mubùnguluki wa mu malaba wàwa."

144 Muyiishi wa ba-Méthodistes mwendè lumù mmwambile muntu kampànda leelu ewu, mu Louisville mwàmwa, wàmba ne: "Ndi muswe kwambulwishakù Mwanètù Billy, kadi udi mumanyè cìndi mufwànyine kwenza anyi? Mbifwànyine kukèngela bwa mèmè kudikèbela bilumbù's." Kabyèna bìkèngela bwa wêwè kudikèbela bilumbù bwànyì mèmè nansha.

Yèyè's wàkeeyeka mwoyi Wèndè bwa bwàlu bwànyì. Amen! . . .? . . .Ngenda mbànda anu ne Cibeeba cya Mfumu, kwajiki. Kaa, ekelekele! Muujiibwe tètè ne Nyuma Wèndè! Mulela ku Nyuma Wèndè! Musukula mu Mashi Èndè! Aleluuyah! Wa disànka!

145 Ne pashiishe cikwabo cintu, mòna's, cìdì cikwenzejà nanku ncinyi? Wêwè's ucìdì anu muntu wetù ewu, kadi cìdì cikwenzejà nanku ncinyi? Mbwalu udi ulwa, wêwè, Nyuma webè mmufùme mu Dyulu. N'Nzambi munda mwebe.

146 Pàngààkayà ku Loomò, ngàkamòna ne bòbò, muntu ne muntu, bàvwa ne nyuma wa cyena Loomò. Pàngààkayà ku Ngelikà, bònsò bàvwa ne nyuma wa cyena Ngelikà. Ngààkayà ku Angleterre; bàvwa bònsò ne nyuma wa cyena Angleterre. Paùdì uya ku myaba kampànda, udi usangana. . .Pashiishe udi usangana nyuma wa cyena Amerike; mmubi be.

147 Pàngààkabwelà mu nkità ya mwinshì mwa buloba ya mu San Angelo mu Loomò, bàvwa ne cibayabaya cifùnda kuulu aku ne: "Bu nwènù mwa kuswa, nwènù bakàjì bàà beena Amerike, ikàlaayikù bavwàle bilàmbà, bwa kuneemeka bafwè." Nyuma wa cyena Amerike's.

Nùbàtàngilaayi pàdìbo bàtùùluka ku ndèkè, ne tulàmbà tukese atu pambidi, bantu bònsò bàbanga kubàbandila, ki Màndèmwàzelè Amerike ulwàlwa ewu. Ki nyuma wa cyena

Amerike nyéyè awu. Wêwè's udi mwa kumanya kùdìye ùfùmina; muvwàle mvwàdilu wa dikèma, balùmyàna wa yààya, wènda ùpulumunangana ne kabwà kakese kàà kale kàà tuminu ku dyùlù. Cya bushuwa's. Kaa, eyowa, yéyè ùdi. . . Mukàjì awu, yéyè ki Amerike, Mándèmwàzelè Amerike; wènda ùpweka, nudi bamanyè's, wènda madyùnda mushindu ewu. Bwa cinyi? Ùdi ne nyuma wa cyena Amerike. Kadi Yesu wàkamba, Ùcifidila bujaadiki bubì ditùkù adi, Wàmba ne: "Wêwè udi wa panshi pa buloba apa. Mémè ndi wa ku Dyulu."

Nenku wêwè ne Nyuma wa Kilisto munda mwebe, udi wa ku Dyulu, dîbà adi udi mwenyi pànwapa.

<sup>148</sup> Kadi udi ne ngiikàdìlù wa mwaba wùdi mufùmìne. Ki cìndì mémè nteeta kwamba. Mwena Loomò ùdi ùlwa mùneemu, ùdi ùdikoonya ku mutù; ne mwena Allemagne ùdi ùlwa mùneemu; mwena Amerike yéyè muya kwàka. Bwa cinyi? Nudi ne nyuma ya matungà a kunùdi nufùmìna.

Ki cìdì citùvwijà twètù batàmbe kushìilangana bikolè ne bàà pa buloba. Udi wa ku Dyulu. Udi mulediibwe. Udi—ùdi mwena—mwàbò wa Bukalenge bukwbabo. Nudi nuciitabuuja anyi? Ki cìdì Nyuma Mwimpè nyòcì aci, mbwà kukuvwija mwena—mwàbò wa Bukalenge bwa Nzambi.

<sup>149</sup> Dîbà adi, wêwè mwikàle mwena—mwàbò wa Bukalenge bwa Nzambi, Cìdì cìkwenzeja maalu mushindu kaayi? Mùdi Nzambi wènza mu Bukalenge Bwèndè's. Mpindyewu, cìdì Nzambi wènza mu Bukalenge Bwèndè ncinyi? Ncijila, bwakàne, bukezùkè bwa meeji, bukezùkè bwa nyuma; Bukolè ne dinanga, diya dya kùdì bajìmìne, dyondopa dya babèèdi, dyenza dya bishimà, dyenza dya bintu binène. Dîbà adi, kùdì bàà pa buloba wêwè udi umwèka bu mpàle, ne bóbò bàdi bàmba ne: "Balùmyàna abu mbajìmìje lungènyi." Nwamònu anyi? Kadi wêwè udi mwena—mwàbò wa mu Bukalenge.

<sup>150</sup> Mufùndù mukwabo wumwepele, panwikalà baswè kuwùfùnda, Yone 12.24. Lekèlaayi nnùtèèlèlèwu lùkàsàlùkàsà. Yesu wàkamba ne:

. . .lutete lwa blé lwòlò lumatè mu buloba. . .lwòlò kalùyì lufwè to, kalwèna mwa kupàtula mwoyi mukwabo to.

Mpindyewu, tàngilààyi, dîyì dimwepele dya dyoya naadi mpindyewu. Nenku vùlukaàyi, dîbà adi ne, kakùyì mpatà to bìdi. . .Mpindyewu, bwenu nwènù, kakùyì mpatà to bìdi bya musinga munene ne bikèngediibwa, ne bya byenzejangana ne bikèngela anu kwenjiibwaci, bwà ùpetè Nyuma Mwimpè mpindyewu. Bwalu, kùyì muMupetè to, kwèna mwa kulwa mu dibìikà dya ku lufù to. Mpindyewu tàngilààyi. Nzambi kèna mwa kushipa mikenji Yèndè to. Aci tudi bamanyè. Yéyè ùdi ùlonda mikenji Yèndè.

<sup>151</sup> Mpindyewu, lu—lutete lwà blé, anyi ditungù dya ditalà, mutwikalà mwa kudyàngata, mùdi Yesu mwambè mwaba awu. Mu bushuwa bwa bwalu, di—ditalà, mu Bible, mvwa anu ncibala leelu ewu, didi dìleedila ku linà anyi ku dimiinu dya mushindu kanà wònsò edi, kadi, blé, orge, ditalà, anyi cintu kanà cyònsò, cidi nditalà. Kadi pàdi lutete lwà blé lùmata mu buloba, mpindyewu, kùdi. . . Twètù bònsò mwab'ewu tukàadi bamòne, bamanyè ne cyòci eci ncitù cyènzekà. Lutete lwà blé, anyi ditungù dya ditalà, didi mwa kwikala ne mmwènekelu mpwàngàne anu ne mwàdi mwònsò, kadi paùdi udyèla mu buloba, ne ditalà adi dyòdi. . .

Didi ne mwoyi wà ku musangu ne ku musangu. Nediye mu buloba leelu ewu, dìdipàtwila mu cicolakola; ne dyàlukila mu buloba, ne dibànda cyàkàbìdi; ne dyàlukila mu buloba. Mmwoyi wà ku musangu ne ku musangu.

Ditalà adi dyòdi kadiyi ne mùtòlokù wà mwoyi munda mwàdi to, nansha dyòdi òmwèka dilenga dya bishi, kadyàkujuukakù to. Nediye mu buloba ne nedibolè, nenku bwàdi mbutùuke. Citùpà cyàdi, bintu byàdi abi, bàdi mwa kukwàta naabi mùdimu bwa kufukisha anyi bikwabo mu buloba. Kadi bwa kwikaladi cyàkàbìdi ne mwoyi, kadyàkwikalakù ne mwoyi to ambà anu dyòdi ne mwoyi wà ku musangu ne ku musangu munda mwàdi. Muntu kanà yònsò ewu mmumanyè aci. Kwèna anu mwa kwikala ne mwoyi to.

<sup>152</sup> Kùdi mwa kwikala bantu babidi, umwe mwikàle anu menemene, bònsò babidi bafwànàngàne anu menemene. Umwe wa kùdìbo ùdi mwa kwikala muntu mwimpè, ùdi mwa kwenza byenzedi bìmpè, ùdi mwa kwenza bikwabo byònsò; kadi muntu awu yèyè kàyi ne Mwoyi wà Cyendelele munda mwèndè to, kàakujuukakù mu dibìikà dya ku lufù to. Kèna mwa kujuuka to; kakwèna cintu munda amu nansha cìmwè bwa kumujuula to. Kakwèna cintu cìdiku mwa kumujuula to, kakwèna Mwoyi to. Pa nanku, udi umòna's, wèwè mwanèètù wa balùme munanga, wèwè mwanèètù wa bakàji munanga, muntu yèyè kàyi mulediibwe cyàkàbìdi to, nansha bishi kèna mwa kwalukila ne kubwela mu Bukalenge ebu to. Nansha. "Lutete lwà blé elu lwòlò kalùyì lumatè mu buloba ne lufwè to." Ûvwa wàkula Bwèndè Yèyè mwine. Kadi Yèyè, kàvwa ne mwoyi wà ku musangu ne ku musangu to, Ûvwa ne Mwoyi wà Cyendelele; ne Mwoyi wùdìYe mukupèèshe, mbwà wèwè kwikala ne Mwoyi wà mushindu wumwewumwe awu.

<sup>153</sup> Mpindyewu, wèwè anu ne mwoyi wà buntu nkààyaawù, mukùmbàne anu bwa kwendakana eku ne eku ne kwalakana: "Mukàji udi musòmbè mu bisànkasanka mmufwè pàdiye ne mwoyi apu," kwèna mwa kujuukakù to. Udi mufwànyine kwikala nsongàakàji wa mutàmbe kumanyika mu tulaasà, udi mufwànyine kwikala nsongàakàji wa mutàmbe kumanyika mu manàyi a twarta a mu kasumbù keenu, udi mufwànyine

kwikala mukàjì udi utàmba kuvwàla bilenga mu ditùnga, udi mufwànyine kwikala mutàmbe bulenga, udi mufwànyine kwikala ne mbùngakeenu mutàmbe bwîmpè, udi mufwànyine kwikala wa bàkuukwila kùdi bàyeebè, udi mufwànyine kwikala bintu byònsò ebi, bìdì byòbì biine, ànu bilenga be, kadi, Mwanèètù wa bakàjì, wêwè kùyi ne Nyuma Mwîmpè munda mwebe to, udi Mwoyi wà Cyendeleele awu, ku ndekeelu kwa njila ewu bwebe mbutùke.

Ne nansha wêwè ne mmwènekelu kaayi anyì nansha bintu ebi biikàle bìshi, anyì nansha wêwè kùyi mumanyike anyì mumanyike, mulenga anyì mubì kwisù bìshi, wêwè ne Mwoyi wà Cyendeleele, *Mwàmwa* newikalè ne mwoyi kashidi ne kashidi.

<sup>154</sup> Piikalà ngondo ne mitooto bimanè kuya, ne buloba budidilè too ne ku mikùnà ne mu bipèèlà, ne bintu byònsò biikàle ne, kabikàdi ne, kabiciyikù to, ne buloba bütetuka bu muntu mukwàcike maalà wàlukila kumbèlù kwèndè bufùku, ne mitooto yibènga kukenka, ne yikùluka mu maulu, ne ngondo mwandàmùke mashi, ne dí—dìbà dikwàcike bundù ne disokòke mpàla, pààmònàbi Mwànà wa muntu ùlwa, wêwè neùkenkè mu bwakànè bwa Yesu Kilisto, bwa kupàtuka mu lukità bu nsòngààkàjì wa citende, mulenga kwisù, bwa kwangata bàyeebè, ne kwikala ne mwoyi kashidi ne kashidi ne kashidi, ne munda mwa bikondo byònsò bya Cyendeleele newikalè wêwè anu ne mwoyi. Ki kiipàcilà kàà Nyuma Mwîmpè nkòkò aku.

Wêwè muumvwèku kaadikòkiibwa kakese nàka, kùCisàkikù kule to.

<sup>155</sup> Nyuma Mwîmpè ncinyì? Nzambi munda mwebe. Yêyè ùdikù bwa cinyi? Bwa kutùngunuka ne mudimu Wèndè munkacì mwa cisambà Cyèndè; bwa kusangisha Ekeleeziya Wèndè pàmwè, bwa kufikisha Ekeleeziya pa kaaba kampànda mu ditùkù edi, kule ne kule kutàmba ba-Luthériens, ba-Méthodistes, ne beena Mpenta, too ne mu mwaba wà ditèekiibwa ne wà ngàsà wa Dyambwibwa. Aci, piikalà citùpà eci cya Ekeleeziya, pààbwelà Nyuma mu Ekeleeziya ewu apa, yêyè neàjuuke anu nàka; ne neàlwe, neàlwe ne bapikula bònsò bàtù balengè Nyuma awu abu.

Ba-Luthériens bònsò bàvwà biimàne kuntu kwàka ne bukènkè bwònsò bùvwàbo naabù abu, mu dibingishiibwa; ba-Méthodistes bàvwà bàdishinda panshi, bàbèèla màyi mwisù, ku dibàlenga dyà Nyuma mu dijidiibwa awu; beena Mpenta abu, bàvwà bàbànda bàpweka ne müsèsèsu ne bàbàbiikila ne mbeena “myakulu-too-ne-ku-bisùlùsùlù” abu, ne, kaa, “bakukuminyi,” ne beena “mu myakulu ya byòkosò,” ne byònsò bya nanku awu abi; nebiimanè mu bwakàne, kumpàlà kwa Nzambi mu Ditùkù adi, cya bushuwa anu mùdi Bible ewu musòmbe apa emu. Nwènú nungitabuuja ne ndi musadidi. . . Nutu numbiikila mupròfeta Wèndè; ncitu ndibiikila mèmè mwine nanku to. Kadi, tèèlejàayi, ndi nnwàmbila mu Dìnà dya Mukalenge. Aba bàdi mu Kilisto

Nzambi neàlwe naabò pàmwè Nendè ku Dilwa Dyèndè, ku dibìikà dya ku lufù, ne anu aba bàdi mu Kilisto nkààyaabò.

<sup>156</sup> Tudi tubwela munda mwa Kilisto bishi, balùmyànà?

“Ku twitabàayi umwe nkutùdi bònsò bakashààlemù” anyi? Bwàlà.

“Ku dilabulangana òmwè dya ku cyanza nkutùdi bònsò bakòkìibwemù” anyi? Bwàlà.

“Ku màyi àmwè nkutùdi bònsò babàtìijìibwemù” anyi? Bwàlà.

Anyi: “Ku òngumba òmwè nkutùdi bònsò bavwijìibwe òngumba” anyi? Bwàlà.

Kadi: “Ku . . .” Kolìntò wa Kumpàla 12.13: “Ku Nyuma umwe,” Nyuma Mwìmpè, Nyuma wa Nzambi, “nkutùdi bònsò . . .” Ba-Méthodistes, ba-Baptistes, ba-Luthériens, ba-Presbytériens: “Endèlaayi mu Bukènkè, bu mùdiYe Yèyè mu Bukènkè, tudi mu bwobumwe muntu ne mukwèndè, ne Mashi a Yesu Kilisto, Mwànà wa Nzambi, àdi àtùkezula ku bubi bwònsò.” “Ku Nyuma umwe nkutùdi bònsò babàtìijìibwe mu Mubidi wumwe, ne bavwijìibwe baabanyanganyi bàà ngàsà Wendè.”

<sup>157</sup> Kwèna mwa kupìcila ku Cilumbulwidi to. “Ewu udi utèeleja Mèyi Àanyi ne wìtabuuja.” Muntu nansha umwe kèna mwa kwìtabuuja pàdiye kàyi mupetè Nyuma Mwìmpè to. “Ne wìtabuuja Ewu udi muNtùme,” pàdi Nyuma Mwìmpè mujaadike dibìikà Dyèndè dya ku lufù. “Udi ne Mwoyi wà Cyendeleele, ne kàakupìcila ku cilumbulwidi to, kadi mmuumùke ku lufù muyè ku Mwoyi.” Cinyi? Kwàdyàkulabulakù Cilumbulwidi to. Kwàkwìmanakù ku Nkwasa Mutòke bwa dilumbulwisha to.

Dyebe dilumbulwisha udi udìpetela anu pànwapa. Wapìcidi ku cyebe cilumbulwidi pawàpici wamba ne, “Ncyèna mwìmpè to, ne dilonga dyanyi kadyèna ne musinga to. Mukalenge, bwela munda mwanyi, ngangàtèku òndombòlè, Mukalenge. Cidi buloba bwa mukupa ebu bwàmpa nansha ciikàle cinyi. Ndombòlèku, Mukalenge, ku Nyuma Webè.” Dìbà adi wàlumbùlwishìbù. Dìlumbùlwishè wèwè mwine bu mutombòke bwa Kilisto, nenku, mu bwakànè Bwèndè, Dìtùkù adi netwìmanè katùyi bàà cifwàkà to mu difwànangana Nendè.

<sup>158</sup> Mushindu anu wumwepele. Munyi? “Ku Nyuma umwe nkutùdi babàtìijìibwe mu Mubidi wumwe.” Nenku pàdi mu Mubidi awu, cilumbulwidi cikaadi cimanè kulumbulwisha Mubidi awu, ne wèwè ukàadi muMwitàbùùje Yèyè bu mulàmbù wà kujìmija naawù mpekaatu webè.

Wèwè udi wamba ne: “S’nkàadi mwenzè aci, Mwanèètù Branham.”

Dìbà adi, pìikalàbi ne Nyuma Mwìmpè mmwalùkile mukupèeshe citampi bu cimanyinu, Nyuma awu’s ùdi ùkubweja mu Mubidi wà Kilisto. Udi ukùdimukila njila mukwabo, ne udi

cifùkùibwà cipyacipyà mu Kilisto Yesu. “Ukààdi muumùke ku lufù muyè ku Mwoyi. Bintu bya kale mbiyè, ne udi mupyamùpyà mu Kilisto!” Amen!

<sup>159</sup> Kaa, bu wêwè mwa kuswa, lekèlà nkutwishishèku, mwanèètù wa balùme anyi wa bakàji wanyì mwena Kilisto. Ditàbuluja edi kadikupicikù to. Udi ne cya kupeta Nyuma Mwimpè. Yèyè ùdi cinyi? Nyuma wa Nzambi. Yèyè ùwva bwa cinyi? Bwa kukulombola, kukuludika, kukuuja, kukujidila, kukubùikila bwa kupàtuka, bwa ùbwelè mu Ekeleeziya.

Ekeleeziya ncinyi, mwakù *ekeleeziya* mbwena kwamba cinyi? “Babiikidiibwe bwa kupàtuka, batàpùlùke.” Kaa, mushindu mwine wùndi mufwànyine kwangacila diyiisha pa cyòci aci mpindyewu mene’s wè! “Babiikidiibwe bwa kupàtuka, batàpùlùke,” beenyi, kule ne bàà pa buloba, beena lwendu ne beenyi, biikàle tujikula twamba ne katwèna pànwapa ne cimenga cya pa buloba citùdi tujinga kusòmbelamù to. Kaa, ekelekele!

<sup>160</sup> Mùvwà Abraham, ne Izàkà, ne Yakòbò, banji kusòmbela, basòmbèle mu ntentà mu buloba abu amu. Bàvwa bàjikula bàmba mùvwàbo beena lwendu ne beenyi, dimiinu dya mupyànyi, mupyànyi kale wàwa; taatù awu, mupyànyi. Twètù tudi mamiinu àbò bòbò. “Nenku bàvwa bènda bàkèba Cimenga Cìvwà Mwibaki ne Mwenji mwikàle Nzambi.” Amen. Bàvwa bènda bàkèba.

<sup>161</sup> Nenku, leelu ewu, dimiinu dyàbò dìcidi anu dyènda dikèba Cimenga cìcilwalwà, dyàmba ne: “Ncyèna muswe kudikumbajangana ne buloba ebu to. Ncyèna muswe kwikala ne cya dyenza ne buloba ebu to. Ndi muswe, ndi ngenda nkèba Cimenga cìdi ciibaka cya nseke yinaayi ya mwomumwe. Ndi ngenda nkèba Cimenga cìdi ne Mwoyi wà Cyendelele, mwikalà dìbà kadiyikù dibwela, mwikalà kamùyikù bukùlùkàji, mwikalà kamùyikù kapese kàà cilàmbà cifiike cya madilu ku cikwàcilu cya ku ciibi, anyi lukità ku luseke lwa kakùnà to. Ndi ngenda nkèba Cimenga aci, Cìdi Mwibaki ne Mwenji, mwikàle Nzambi.”

<sup>162</sup> Kùdi mushindu anu wumwepele bwa kucipeta. “Kùvwa Dibwe dyàkakòshiiwbwà ku mukùnà awu, kakùyi ku dikwàcisha dya kùdi byanza to, dyàkabùngulukà pa buloba ne kubùvingutula, ne bwàkalwa mùdi bu blé...anyì bisòte mu cishiipwilu.” Dibwe adi, Kilisto Yesu awu; Dibwe dya cilèndwishi bwa bàà pa buloba adi, Dibwe dya ditàpangana ku mwoyi, Dibwe dya bàseka, cilèndwishi bwa ekeleeziya; kadi dya mushinga mukolè ne Dibwe dya dikòka byamù bwa mwena kwitabuuja, Dibwe dya ditwishiibwa, Dibwe dya diikisha. Kaa, ekelekele!

Munkaci mwa kwikisha! Mémè ndi mumanye ne ndi muumùke ku lufù muyè ku Mwoyi. Musùukà wànyì wùdi mu diikisha. Kaa! “Lwàyì kùNdi nwènù bònsò bàdi bàkwàta



mudimu mukolè ne bambùle majitu, ne Mémè nènnùpèeshè diikisha dya misùùkà yenu.” “Ci—cimanyinu ciikalàbo ne cya kwamba bibi,” mwàkambilàbo Mariya kùdi mu—mupròfetà. Yèyè neikalè cimanyinu, bushuwa, ki ciikalàci. Kadi Yèyè neikalè ditwishiiibwa. Neikalè dinanga. Neikalè disànkishiibwa. Neciikalè cintu cya umanya ne udi muumùke ku lufù muyè ku Mwoyi.

<sup>163</sup> Wèwè mwanèètù wa balùme, wèwè mwanèètù wa bakàji; mèmè bu mwanèènù wa balùme, bu musadidi wenù mu Kilisto, lekèlà nkuswishishèku, ne mwoyi wànyì wònsò. Kùlekedikù eci cikupicila pamutù, anyì ku luseke, anyì mwinshi mwebe to. Cyàkidilè mu mwoyi wèbè, nenku newikalè muntu wa dyàkalenga pa buloba.

Ncyèna nkulaya ne neupètè mùliyò wà ndola nansha. To, mukalenge. Mwanèètù Leo, ngeela meeji ne kùdi byàbùngì bya bu nanku menemene bìdi bilayiiibwe mpindyewu ne, “mìliyò ya ndola,” bintu bìdi bantu bashiilèshiiilàngàne bambè. “Wèwè mushààle mwena Kilisto, udi mufwànyine kupeta mùliyò wà ndola ne newikalè mutu mubanji.” Mémè ncyèna nkulaya cintu nansha cimwe to.

Cìndi mèmè nkulaya ncyòci eci, cintu cimwepele cìndi mwa kukulaya: Lupàndù lwà kùdiYe. Ngàsà Wendè mmukumbàne bwa diteeta dyònsò. Bantu bàà ku Mpenta abu, kabàvwa nansha baswè biine bìvwàbo naabi abi to. Mpindyewu udi wakula bwa beena tètè mu nzubu tètè pambèlu anyì? Bòbò kabàvwa baswè biine bìvwàbo naabi abi to, Mwanèètù wa bakàji Angie.

<sup>164</sup> Ndi njingakù ngaanùumvwa wèwè ne Gertie nwimba, dimwe dya ku matùkù aa, (Üdi penyì?), *Lumingu Lwà Dyalukila Kumbèlu*, dimwe dya ku matùkù aa. Bààbùngì bàà kùdìbo bàkaadi bayè dyàmwàmwà dya mukàlu kubangila anu piine apu. Kaa, ekelekele!

Kabàvwa bàlòmba bintu binène to. Kabàvwa bàlòmba mfrangà to. Mòna’s, Peetèlò wàkamba ne: “Nì ng’argent nì nngòlò mèmè ncyèna naabi to, kadi cìndi naaci, nènkupèeshèci.”

Nenku cyòci aci ncìndi ngamba dilòdòlò edi, nwènù balundà bàànyì. Disànka, dinanga, ditwishiiibwa, bìndi naabi bya kùdi Kilisto ne dibiiikà Dyèndè dya ku lufù abi, bìndi naabi abi, ki bìndi nnùpèèsha; ndi nnùpèèshabi, nwènù bu bàna bàà Nzambi.

Nenku lwà ùshaalè ku nkùrusè piikalàbi ne Nzambi mmukubiikile, ne kùjuuku to. Pawàlwà màlabà dilòdòlò, ùlwe anyì bwa kubwela mùneemu ne kushààla too ne pàjikàku, anyì udi ulwa bwa tùsambilè tùkutentèkèlè byanza. Ndàayi. . . Aci ndiyi ditùma dya Bible, kubàtentekela byanza bwa Nyuma Mwímpè. Ne pashiishe netùyè, newàlukilè kwebe kumbèlu. . . Wèwè mushààle anu mwaba awu, wèwè mushààle bufùkù bujimà, ushààla ditùkù didi dilondà, ushààla ditùkù didi dilondà, ushààla mu diikisha dijimà, ushààla too ne ku ditùkù

dya kumpàlà dya cidimu, ne utùngunuka ne kushààla, shààla too ne.

<sup>165</sup> Mbwà ne, cyònsò citùdì tufidila dileeja dya njila bwa mààlabà dilòòlò, tunùleeja mu Bible cidi ne cya kulwa, necilwe. Nenku pààlwàYe, dìbà adi kakwènakù baadémons búngì bukùmbàne mu dikengesha. . . Udi mumanyè ne wàmányì kuumuka ku lufù wàyi ku Mwoyi. Udi cifùkìibwà cipyacipyà mu Yesu Kilisto. Tungonga twà disànka twà mu Dyulu netùdilè.

<sup>166</sup> Mwanèètù Othal, ndi nkwambila ne, cidi cikulákusha anu kapyà. Nsongààlùmè mukolè nyèyè ewu musòmbè kaaba aka, mwanèètù wanyì mukolè, uvwa kánkè wa wènda ne bingoma bipàyika ku luseke, wènda ùkèba muntu mu ditumba, muntu kampànda wa kutaayishayè bwongò. Kadi cyàkenzekà ncinyì? Dìngà ditùkù kutàngilayè ne kwitabuujayè bwa Mwoyi. Ki kutùngunukayè ne kuya. Kulondayè masangisha àànyì. Nenku mukwàcikwètu awu, kàyi ne biine byàkudyà bya nsongo to, ùdyàdija ne ùlààla mu bisuku ku luseke lwà ntentà, ne nzala ne nyòòtà. Ki dīngà ditùkù Nyuma Mwimpè kulwaYè. Kaa, mwanèètù wanyì, e kukushintululaci's, kí mmwòmò anyì? Kutwàlaci Mwoyi, ne kuumushaci lufù. Lukìnu kuumukalù, ne dinanga kubweladi. Kaa, ekelekele! Lukunà ne makòkyanganyi byònsò byumba byàngata cimwangì; Mwoyi mupyamùpyà kubwela.

Tàngilàayi mwab'ewu bakwabo kuvudija ku bakwabo, bakwabo kuvudija ku bakwabo, kwònsò kwàka. Kaa, tungonga twà disànka twà mu Dyulu tùdila! Balundà bàànyì, kakwèna mushindu wà mèmè kubyamba to.

<sup>167</sup> Tèèlejàayi, bwa ngaamònakù mwa kunùshiila cyòci eci, piikalàbi ne nudi biitàbùùje bujaadiki bwànyì, mèmè bu musadidi wa Kilisto, ne muteetè bwa kunùleejila mu Bible wa Nzambi ne ncyà bushuwa. Kadi mèyi àànyì pa bwalu ebu òwò ùmwika bu ne mmafwànyine kwikala makolè ndambu bwa kuùmvwa, tàngilàayi fòtò wàwa mu maalu a mamanya. Tàngilàayi mamuma, àdì Dikunji dya Kapyà dyàkalombolà bàna bàà Izaleela edi, tàngilàayi nùmonè mamuma àdìDi dikwàma. Mònaayi cidiDi dyènza, cidiDi dyamba.

Udi wakula awu kí mmèmè to; n'Yèyè udi wakwila kùdì, nudi numòna's. Udi umòna cikèèna-kumòna kí mmèmè to; n'Yèyè udi wakwila kùdì. Udi wondopa babèèdi kí mmèmè to; Yèyè udi munda mwebe, ngudi wondopa babèèdi. Kí mmèmè udi uyiisha to; mèmè ndi muntu mutulùmùke udi udicìina, ne ùnyeema meeji miine, kadi Yèyè ngudi wakwila kùdì. Mèmè ncyèna mumanyè Dìyì to; kadi Yèyè ngudi muDimanyè. Ki mùdìbi. Ki mùdìbi. Ki mùdìbi nanku.

Nenku's ki Yèyè wàwa. Ne Mwanjelo umwèmwè wa Nzambi awu ùdi kaaba aka mene mu citanda emu dilòòlò edi. Kaa, mushindu mwine wùndi mèmè ewu muMunangè's wè!

168 Mpindyewu mbanganyi bàdi baswe kupeta Nyuma Mwímpè? Tùkenkètaayi nsòmbelu yetu. Mbanganyi bàdiku kabàyi banji kuMupeta, kadi baswè kuMupeta? Ela cyanza muulu, wamba ne: “Mwanèètù Branham, mu ndòndò wa mwoyi wànyì, ndi muswe kupeta Nyuma Mwímpè.” Nzambi ànùbènèshè, myaba yònsò.

169 Mbanganyi bàà kunùdi bàkaadi baMupetè, ne baswè kuya mwàkenzàbo mu Byenzedi 4, bàmba ne: “Éyì Mukalenge, Éyì Mukalenge, olòlàku cyanza Cyebe bwa kwondopa, ne kuleeja bimanyinu ne maalu a kukèma mu Dîna dya Mwan’Èbè wa cijila Yesu, ne mpèèshèku bukitù bwònsò ne dinanga, bwa kwakula, ne dyujiibwa dipyadiyà?” Eyowa, cyànyì ncyòci eci, mèmè pàànyì. Nzambi, Mumpèèshèku.

Twinyikàayi mitù, mu meeji matòòkè matàmbe kwikala a ndòndò, muntu ne muntu mulamìne dijinga dyèndè mu mwoyi wèndè.

170 Mukalenge Yesu, nyewu twoya didikùngwija dikese edi dilòòlò edi, paanyimà pàà bwobùmwe bwa banyùngùlùkile Dîyì ne Nyuma Mwímpè. Mushindu mwine wàtùbènèshiYè ne wàtwìcìkijìdìYe maanyì a Dîyì Dyèndè mu myoyi yetu’s! Kùdi bambi, kùdi bantu kaaba aka bàvwà bàà bipidi byònsò bya nsòmbelu, bàdi balabùle ne bamòne ne Mukalenge mmwímpè. Twàmányì mpindyewu cìdi Nyuma Mwímpè, mulayi wà Nzambi. Yèyè ùdi Mwoyi wà Cyendelele kùdi bàdi bìitabuujà mu búngì bwònsò.

171 Kabidi tudi bamanyè ne Nyuma Mwímpè ùvwa Nyuma wa Yesu Kilisto wàkatùmiibwa, ne Yèyè ùdi munda mwetu leelu ewu. Bu mùvwà Nzambi kumutù kwetu, mu Dikunji dya Kapyà adi; pashìishe kwendaYè neetu, mu . . . mubidi wàkabìikidìibà ne *Èmanuùwèlè*, “Nzambi neetu”; ne mpindyewu Ùdi munda mwetu, ku Nyuma Mwímpè, Nzambi munda mwetu. Kaa!

Yesu wàkamba ne: “Mu ditùkù adi nenùmanyè ne Mèmè ndi munda mwa Taatù, ne nwènù nudi munda Mwànyì, ne Mèmè ndi munda mwenu. Nenùcyùmvwè mu ditùkù adi. Bwalu, nudi mu buloba bwa mîdimà, mutùdi mwa kwamba, mpindyewu, kadi mu ditùkù adi nenùmvwè.”


172 Taatù, kî ncifwànyine kuvwijiibwa citòòke tòò ne cipwàngàne to, bwalu bìikala nanku katwènàkù bafwànyine kwikala ne cintu nansha cimwe cya kwikadilakù ne diitabuujà to. Kadi byenzedi byònsò bya Nzambi mbilombòdiibwe kùdi diitabuujà. Nenku ku diitabuujà mu Dîyì Dyebe, mu cileeji cya Nyuma Mwímpè utùdi bamanyè ne ngudikù mpindyewu awu, ndi ndòmbakù bwa musùkà ne musùkà wònsò wùdi ne nzala mwab’ewu wùjiibwè ne Nyumà Mwímpè. Aba bàdi kabàyi Nèndè abu, kadi biikàle Nèndè ne nzala, bàvulukè anu . . . Tudi bafwànyine kubàmbila, Mukalenge, muWàkambà nunku ne: “Nudi bàà dyàkalenga panùdi ne nzala ne nyòòtà. Nenùujiibwè.” Aci’s mmulayi. Ne bidì mene dyàkalenga bwa kwikala ne nzala.

Nudi bàà dyakalenga pa kumanyakù anu mene ne Nzambi wākùlù neenu, bwalu nCyambè ne: “Muntu nansha umwe kèna mwa kulwa kùNdi pàdì Taatù Wanyì kàyi mumukòke dyàmbedi nansha.”

<sup>173</sup> Nenku, Mukalenge, aba bàdi bankòlomù bàà kale kaaba aka, nyewu beelè byanza muulu. Nyewu ndi mwelè cyànyì pàànyì. Èyi Mukalenge, tùpèèshèku dikàndà, tùpèèshèku Bukolè bwa kwolola cyanza cya Mwan’Èbè wa cijila Yesu, bwa bimanyinu ne maalu a kukèma kwenjiibwabi, bwa kwikalaci mudimu wà bwambi mutàmbe kwikala wà ndòndò, cintu citàmbe bunene cidi kacya kaciyikù cyanji kwenzeka to. Tùpèèshèku bukitù ne dinanga, bwa kwakula ne bantu. Enzàku nanku, Mukalenge. Ikàlàku neetu mu maalu ònsò, tudi tulòmba mu Dìna dya Yesu.

<sup>174</sup> Nenku mààlabà dilòlò, Mukalenge, swàku bwa kùlwe cipeepèlè cicolè cya civuma, cimatè mu citanda eci, bwa kwikalaci anu bu dikwabo Ditùkù dya Mpenta. Cishìmikidi cyàmanyì kutèekiibwa. Byònsò bidi pabwipi. Ngombe yàshebèyìibù, twànà twà ngombe twà maanyi twàshebèyìibù, bimpàngà bya mikooko byàshebèyìibù; mèèsà àdijìibù, babiikila bábìikidiibu. Èyi Mukalenge, tùmakù cibilù cya disànkà cya Mpenta, mààlabà dilòlò, mu citanda eci, ne ujàku musùkà ne musùkà wònsò ne dibàtiiza dya Nyuma Mwîmpè. Enzàku nanku, Taatù. Tudi tulòmba nùnkù mu Dìna dya Yesu. Amen.

Netùyiilè bintu byàbúngì,  
 Netwikalè ne lunkòmbè lùdi lwenza ne ngòlò,  
 Pàmwàpa ne nshinga cinunu;  
 Netwìmbè misambu twela mbilà tujà maja  
 twenda tunyùnguluka,  
 Mwànà wa mùkòòkò neàtùkàmishè binsònji;  
 Netwikalè ne lumingu lumwèpelè lwà  
 dyalukila kumbèlu,  
 Bidimu binunu dikumi bya kumpàla abi.  
 (Amen!)

Mashi a mushinga mukolè a Mwànà wa  
 Nzambi Sungasunga mmasukùle ne majidile  
 Cisàmbà cya cikèmesha bwa Dìna Dyendè ne  
 bàdi bábìikidiibwa ne m’Mukàji-musèla.  
 Nansha balèngùlùdiibwe ne bapeetùdiibwe  
 pànwapa, dîngà ditùkù Mukalenge neàye ne  
 Basungula abu munda mwà ciibi cyà lupangu,  
 ne cyôci aci ki cidi ne mushinga kutàmba  
 byònsò. 

59-1217 Nyumà Mwímpè Wàkafidiibwa Bwà Cinyi?  
Branham Tabernacle  
Jeffersonville, Indiana États-Unis

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bìngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)